

皇明史竊



# 史竊序

皇帝之十年余與寶安

尹冲玄先生同舉於鄉迨通藉

未幾同返初服癸水榕溪之濱

吾兩人歲一至焉至則出所著謨互

相商確一日余出彙史以質先生曰



此述古者也不敢作也彙之年先  
生亦出史竊以示余曰此誌今者也  
不敢專也竊之耳歲月幾何先生  
躋大壑而遊岱史竊梓成矣今

之十年先生長公魁昌登賸書乃以  
史竊屬序於余曰吾先子之志也余



卒業唯、微子言余久已心許之  
其敢以羞辭夫史難言矣古之為史  
者數十家班固范曄當時一以為  
淺陋一以為佻巧自漢而下有不稗  
官晉齊諧六代期期唐書無宋史  
而弗穢遼金元三氏者乎是其疵處



浩如烟海雖更僕未易悉論其醇  
者則左氏與龍門氏稱良史焉乃  
范甯謂丘富而艷其失也誣王通謂  
史之失自遷始曰記煩而志寡噫二史  
猶不免於腹誹則言史於今尤難之  
難矣雖然脩詞之軌多端立言之途



惟一述前者宜據信後者宜實謀  
始者宜慎布言者宜忠史者所以  
合散而一殊者也非據不妄指乎非  
實不溢美乎自我述之自我始之而或  
妄也溢也謂慎乎斯固言以布之  
也不慎謂忠乎四者失一不足以訓矧



并其四而失之勢必至於流綴溢簡  
踏雜而不可以觀此又今野史之通  
弊也余習先生久知先生之才無所不  
宜其學無所不窺逆經外史汲冢  
禹穴之編玄宗內典金經玉笈之秘  
陰陽醫卜百家技藝之書當世與



章文物錢穀甲兵山川扼塞之要  
澹家比讞之言一時士人流品山澤  
遺逸之材無不蓄諸胸中握之掌  
上一旦有慨於

明興幾三百年景化醲郁人文熙朗  
凌躒近代追軌古初固宜勒之琬琰



以垂不朽乃正史未舉積有年代  
於是取

歷朝典故及散見於諸書者出之以一

之筆探賸補漏提要鉤玄為紀八  
卷志六卷世家十卷列傳八十三卷而  
紀志之闕者俟焉法立明以為編年



濂子長以為紀傳總之右質而左文  
正疑而傳信務詳而忌畧崇雅而黜  
誣余見其紀事也溯其所可知非據  
乎言其所必覈非實乎疑之必闕非  
慎乎其言惻怛尊親是悖非忠乎  
四者脩矣分途別類名義周秦闡



幽攝顯論讀悉精可謂括倫鑒  
之要深墳素之情者矣豈不足以上  
班良史之才乎鄭夾漈有言六經之  
後惟有此作子長不能受之固應  
讓之後人斯言也微先生誰與歸  
昔班氏漸其父業而或者以野史



之乃章帝益出秘書給筆札於  
蘭臺之署俾續成史今先生之子  
老廉魁昌文學兆昌玉如皆博物  
弘覽世其家學不日聯翩起讀中  
秘書

聖天子坐白虎給筆札各局計畧出



金匱石室之闕令蘭臺之彥勒成一  
代大典吾見先生之孟若季必以先  
生成書進且大闡先生之旨以補先生  
之闕而成不朽盛事

凡重萬幾之暇犁然有當於衷行將  
頒布中外昭茲來許先生雖往有不



往者存信乎其書如日其道如山矣竊  
之云乎哉若余之彙史卷帙浩繁殺青  
無日祇合付兒曹藏之笥中以飽蠹  
耳余甚愧先生矣余甚愧先生矣

崇禎戊寅秋日眷年弟張萱題于  
西園之論世齋時年八十有一



# 史竊序

甚哉史學之難言也不挈  
其綱則漶漫無章不釐其  
緒則挂漏難忘不勘覈一  
代真精元氣榮鏡所在則



人物減否古今升降禮樂  
刑政豐殺野僊形勢阻隄  
封疆壺櫟與夫山藪川浸  
土田墳壚之屬犁然悉備  
猶思莫遯說鈴書肆之詆



娛維春秋一編文成數百  
其指數千獨劬義例龜準  
皇王洵三代以還炳乎揭  
赫曦而行中天者佗如龍  
門扶風平陽順陽永康鉅



鹿革非不人成一家言以  
軌於春秋猶然爝火起於  
日月廼範世貞教者輒舉  
吾鄉紫陽綱目相提而論  
雖微言刺譏不謂盡符節



春秋其懷奉憲章匡豎一  
王大法眡春秋微指蓋有  
非僅僅彼善於此焉者今  
伏讀冲玄尹先生史竊一  
編則又不禁憑今弔古之



欻歔矣洪惟我

太祖高皇帝手提三尺順應

天人驅虜廓清鎮奠海岳

以復士民冠履尤湯武弔

伐後所不再覩者猗歟休



哉且其間關戰伐之餘壹  
惟寬柔彰信視聽從民爲  
已任而興滅繼絕舉逸征  
麾所指不遺餘力泉金陵  
鼎定首樹之教獨丁寧孝



弟著爲六言而鐸振之煌  
煌天語至今戶說眇論直  
與布帛菽粟相終始此寧  
偈偈鞭長駕遠雄視中原  
被四海籍受九咳經者可



同年語哉先生所撰著者  
凡八紀六志十世家八十  
三列傳各繫以論贊衷之  
大義特凜褒誅輸寫論世  
知人之志討其原本庸詎



提要鉤玄采菲集榛爲振  
耀後人耳目計蓋已舉

商  
皇帝孝弟作人與

列聖闡釋光大釀爲乂康  
者參伍錯綜互演篇端予



是以深有感

明興二百年來真精元氣  
榮鏡宇宙孝弟所貽謀者  
遠先生楊屹鋪張教孝教  
弟垂千百禩者匪淺尠也



間嘗歷選帝王易姓受氏  
倨起御六者多不及格表  
表若漢高宋藝祖亦不過  
三章約法重門洞開一二  
語而止孰與



高皇帝孝第六言上與陶虞  
接夫三言固一言之匹也  
而六言實三言之匹也此  
卽是精一此卽是執中惡  
在追宣父祖述與春秋憲



章之遺更復有外斯編也  
乎于以配綱目而昭來許  
又何多讓焉往予先司馬  
嘗著爲講藝論有曰不班  
白語道失且自然諾非虛



語先生謝仕三十年網羅  
昭代文獻扃戶櫛擷迄大  
耄始勒成此書致躋先司  
馬于文苑鼎足婁江歷下  
倘亦不謬其班白之語也



與予無似蒞莞也晚不及  
把先生臂猶幸獲挹先生  
令子孝廉文學三君講孔  
李之雅而諸君又皆褻然  
天祿國器今茲緒言自外



無當先司馬更又何嘗

生猥云藉附不朽則予其

愧之矣

崇禎己卯仲夏通家侍教

生汪運光頓首拜撰



作易者其有憂患乎作史而  
之明夷孔子之懼迨旨而  
而記皆出憂患然在一身

僅焉耳以聖賢英傑而憂寤  
刑所憂所患實在世運易援天



以治人史理人以憲天易以陰  
陽分治亂史以脩悖定吉凶總  
以憂患持世運故曰在一身者  
僅焉耳以史多憤激而作固也

氣憤則病水激則旱憤激則  
不平則喜怒溢喜怒溢則



予奪爽安在為一代之得作史  
者多受天刑亦為憤激言也所  
以憤激淺而憂患深憤激者僅  
一身而憂患者繫世運也憤激  
者或不能泐其身而憂患者遂  
以燕其子孫也我



國家立隆鑠紫磐以浩昌殷綸  
焯起視漢西京不啻百十過之  
乃漢末百年而太史公成一家  
言鋪揚鴻烈我

國家幾三百年所為

實錄及



起居注者不過條奏升除事各  
一時人各一手或視為邱報一  
大滙不聞蘭臺之英多董狐之  
直繫少憂患并不敢有憤激也  
至所以蒐羅而論斷之者如吾  
學編文獻通考憲章錄史料通



紀不過四五公耳其得失俱可  
考也今讀冲玄尹先生之史竊  
庶幾集諸公之成而微窺其憂  
患也先生以聖賢英傑之徒且  
有良史才而僅終於吾邑新昌  
令或曰新昌軹先生也不究厥



施或又曰新昌王先生也得肆  
力著書小子則曰新昌以憂患  
啓先生也而史竊以成以一令  
之窮通為憂患則亦一身之僅  
焉耳直道而黜貞女誣詆讒夫  
高張一身嬾庵焉往不得然可



以觀世運則其憂患者大而且切夫三百年之政治聲教亦屢變矣開創之何以艱難中興之何以振作晚近之何以墮窳陵夷無不犁然具備凡所論斷而為之想慕而為之嗷嗟總有不



能超於衷者而進退予奪一秉  
於一王之大法以不戾於中正  
之道昔夫子有志於三代之英  
蓋要在從周先生之拜颺昭代  
正深其皇王之想矣至三志一  
紀庶幾史之闕文而見聞傳聞



之微顯其詞皆倣孔氏家法信  
一代之鴻裁嘗慨我

朝之史居其官者未必有其才  
具其才者或牽例而不克舉其  
職或遺佚而不居其官今史在  
於野是名為逸宜多憤激而先



生諸論皆以忠厚惻怛之意寄  
其憂患故憤激之旣還受之身  
憂患之福食於孫子今先生三  
子魁昌兆昌玉如克萬石之家  
遷談彪固佇在天祿以世其史  
予先君嘗辱先生特達茲拜先



生之主見其子讀其遺書竊以  
憂患一語相似質之先生族子  
德隣先生嘗為柱下史亦謬以  
為不誣也頃何非鳴先生有事  
於新昌志將脩載先生之不朽  
讀先生自序不欲示人竊以筭



州當名山藏然吾何以知先生  
非憤激也先生至行清風漠然  
於世東官之人士無不薰之有  
德者庶幾有言不然安測其與  
易之憂患同耶先生以竊取為  
竊比夫亦竊古人之憂患乎



崇禎九年丙子春仲豫章通家  
門下生戴國士頓首拜誤

吳門後學陳上善謹書



# 序

史竊凡一百餘五卷予同郡東  
邑尹先生之所著其曰竊之也  
者附于春秋之義也先生官止  
新昌令未嘗得居史職故惟以  
其所竊聞者爲史然而予嘗推



之凡史家求其精當率古之不  
如今而朝之不如野予讀古史  
恒疑之如三皇五帝之號孔安  
國序書與易大傳異攷之家語  
若大戴氏得左右袒焉豈壁書  
固有據與班氏作古今人表其



糾繆者如后夔豕韋范武子  
會計然范蠡之類甚至一人妹  
山腐遷之書則堯舜世系殆不  
以禮說夫名號姓氏且無繇  
他何可問焉故曰述古之  
志今也且夫仲尼見聞傳聞



是有逋異若董狐者其可相繼  
得哉有如蔡邕則足人適惡之  
則是崔浩之酷可懲毋惑乎韓  
愈之所不肯爲也咸謂崔浩毀  
滅佛教致取其誣韓愈不此之  
畏而久之畏觀于禁門喋血之



事始有曲筆又豈若藏之名山  
以是爲是非之當哉故曰在朝  
之不如野抑予嘗聞之矣夫人  
著書多出予慨慷感激感而有  
心不能以虛受人而言以情遷  
又非獨索米立傳者爲然也腐



遷之津津 貨殖非乎其他

共立見聲影分聚無所無之予  
觀尹先生則有超然于中者爲  
廉吏不自嘆其爲不可旣遂初  
服居羅浮下大海之濱結巢而  
息澹漠無營于世世亦鮮能



知之其書不以示人惟求一

頃予過曾出而商之所闕三志  
一紀猶將有所覈也他如一二  
近事多有不可平爲耳目所熟  
者且徐以俟之論定不肯稍  
涉好惡一附以見焉予故知是



之可傳而無媿也今先生逝  
之讀其所爲自序使人感其爲  
思予曾貽書于其子魁昌兆昌  
玉如勗以遷談彪固比長公  
成書來相與謀焉會予方衍易  
史不遑效少孫之筆夫以先生



之爲書洵能成一家言其于通  
邑大都無容異議也今儒者讀  
書期知所興廢以爲懲法攷之  
徃古若存若亡觀之

當代庶幾信焉而其所以然之  
言未可信也誠如先生者豈有



求于人人自求先生之書猶恐  
不可得則亦人自求先生之書  
自得之而已矣先生三子若諸  
孫皆躬行力學他日必有顯于  
朝以行先生之微言者予以齒  
後先生半百餘歲然昔者一見



相知實深卒之日猶以離支一  
函詩數章手書寄予且屬其子  
若孫曰夫人之可以與言者吾  
得見其心亦已足矣慎毋以黎  
子之遠而忘之予是以不辭而  
爲斯序皆



崇禎甲戌九月旣望

番禺黎遂球題



皇明史竊目錄

明新昌令東莞尹守衡

帝紀八卷

志六卷

世家十卷

列傳八十三卷

第一卷

開國紀第一上

開國紀第一下

第二卷



靖難紀第二

第三卷

革除紀第三

第四卷

北狩紀第四

第五卷

奪門紀第五

第六卷

親征紀第六



第七卷

明倫紀第七

第八卷

高后紀第八 闕

第九卷

百官志第一 闕

第十卷

田賦志第二 闕

第十一卷



禮樂志第三

第十二卷

軍法志第四

第十三卷

刑法志第五

第十四卷

河漕志第六

第十五卷

中山王世家第一



第十六卷

開平王世家第二

第十七卷

岐陽王世家第三

第十八卷

寧河王世家第四

第十九卷

東甌王世家第五

第二十卷



黔寧王世家第六

第二十一卷

誠意伯世家第七

第二十二卷

靖難二世家第八

第二十三卷

懿文太子列傳第一

第二十四卷

漢王趙王安化王寧王靖江王列傳第二



第二十五卷

宦官列傳第三

第二十六卷

郭英吳良吳復康茂才耿炳文楊璟薛顯列傳第

四

第二十七卷

馮勝傅友德藍玉廖永忠列傳第五

第二十八卷

桑世傑張德勝花雲胡大海耿再成趙德勝韓成



俞通海列傳第六

第二十九卷

胡美何真韓政曹良臣陸聚梅思祖列傳第七

第三十卷

小明王方谷珍明玉珍納哈出列傳第八

第三十一卷

李善長汪廣洋胡惟庸張昶楊憲陳寧列傳第九

第三十二卷

葉琛王愷胡琛孫炎于光朱顯忠熊鼎列傳第十



第三十三卷

陳遇陶安章溢唐鐸凌漢楊靖茹瑄列傳第十一

第三十四卷

汪河羅復仁傅安楊善李實趙榮劉戡列傳第十

二

第三十五卷

宋濂蘇伯衡胡翰王禕吳雲桂彥良魏觀列傳第

十三

第三十六卷



樂韶鳳朱升劉崧陶凱詹同劉三吾錢唐曾魯徐  
大年貝瓊梁寅劉于王珪張唯郭傳列傳第十

四

第三十七卷

劉仲質吳伯宗吳沉朱善權謹列傳第十五

第三十八卷

詹徽開濟列傳第十六

第三十九卷

張孟兼葉居升鄭士利列傳第十七



第四十卷

姚廣孝郭資金忠列傳第十八

第四十一卷

解縉黃淮胡廣金幼孜列傳第十九

第四十二卷

蹇義郭璉吳琳翟善夏原吉黃福胡濙周忱列傳

第二十

第四十三卷

師達郁新段民古朴宋禮張純王鈍列傳第二十



一

第四十四卷

韓宜可陳諤戈謙周新王英列傳第二十二

第四十五卷

李希顏汪叔儀智金問鄒濟徐善述王汝玉梁潛

周冕列傳第二十三

第四十六卷

王直王翱列傳第二十四

第四十七卷



李秉崔恭李裕黃孔昭朱希周列傳第二十五

第四十八卷

劉大夏戴珊張敷華何喬新周經韓文列傳第二

十六

第四十九卷

姚夔周洪謨楊守陳倪岳吳寬黎淳列傳第二十

七

第五十卷

王恕彭韶林俊列傳第二十八



第五十一卷

于謙王竑項忠肱余子俊列傳第二十九

第五十二卷

羅通羅亨信程信列傳第三十

信後程敏政另傳

第五十三卷

韓雍朱英葉盛葉夢熊列傳第三十一

葉傳闕

第五十四卷

楊信民孔鏞邵廷讚列傳第三十二

第五十五卷



林鶚樊瑩黃紱列傳第三十三

第五十六卷

秦紘楊繼宗熊繡陳壽傳珪吳廷舉列傳第三十

四

第五十七卷

馬文升許進列傳第三十五

第五十八卷

王瓊彭澤陳九疇伍文定翁萬達列傳第三十六

第五十九卷



皇明史稿 目錄  
胡世寧李承勛列傳第三十七

第六十卷

霍韜海瑞列傳第二十八

第六十一卷

宋訥胡儼李時勉王嘉會吳溥錢宰趙俶羅師程  
孫貞陳敬宗謝鐸章懋羅欽順魯鐸呂柟王雲  
鳳列傳第三十九

第六十二卷

吳訥魏驥陳璉孫鼎陳選高瑤張悅林瀚王鴻儒



邵寶列傳第四十

第六十三卷

儲瓘瞿景淳列傳第四十一

第六十四卷

曾榮楊廉羅玘王廷相崔銑鄭曉雷禮列傳第四

十二

第六十五卷

顧佐邵玘向寶石璞虞謙王槩陳鎰耿九疇年富

軒輓曾穆李綱列傳第四十三



第六十六卷

楊士奇楊榮楊溥列傳第四十四

第六十七卷

李賢商輅高穀岳正劉定之列傳第四十五

第六十八卷

彭時徐溥丘濬劉健謝遷王鏊李東陽列傳第四

十六

第六十九卷

楊廷和梁儲費宏楊一清列傳第四十七



第七十卷

張孚敬李時席書桂萼方獻夫夏言列傳第四十

八

第七十一卷

徐階趙貞吉張居正列傳第四十九

第七十二卷

道學

曹端薛瑄吳與弼陳獻章胡居仁列傳第五十

第七十三卷

道學

羅倫陳真晟賀欽莊景張元禎列傳第五十一



第七十四卷 道學

蔡清陳茂烈林光李承箕魏校列傳第五十二

第七十五卷 道學

王守仁湛若水列傳第五十三

第七十六卷 道學

羅洪先唐順之鄒守益王畿王艮劉陽列傳第五

十四

第七十七卷 道學

羅汝芳楊起元耿定向夏叟王敬臣鄧元錫劉元



卿列傳第五十五

第七十八卷

鐵鉉景清卓敬陳迪恭昭姚善錢芹黃鉞楊福陳  
彥回黃希范葉仲惠徐安孫鎮三叔英周是修  
黃觀廖昇王良顏伯瑋梅殷列傳第五十六

第七十九卷

練子寧方孝孺列傳第五十七

第八十卷

高巍韓郁楊砥楊本尹昌隆平安列傳第五十八



第八十一卷

程濟雪菴和尚河西儲補鍋匠藏九上人列傳第

五十九

附革除彙誌

第八十二卷

齊泰黃子澄列傳第六十

第八十三卷

劉儵陳洽何忠劉子輔易先列傳第六十一

第八十四卷

曹鼎鄺塾列傳第六十二



第八十五卷

孫遂許達列傳第六十三

第八十六卷

陳祚劉球鍾同章綸廖莊列傳第六十四

第八十七卷

楊瑄列傳第六十五

第八十八卷

林聰豐慶列傳第六十六

第八十九卷



鄒智列傳第六十七

第九十卷

黃輦陸震舒芬汪應軫列傳第六十八

第九十一卷

楊爵周天佐浦鉉劉魁周怡列傳第六十九

第九十二卷

楊繼盛沈鍊沈束列傳第七十

第九十三卷

郭登楊洪仇越徐有貞王驥王越列傳第七十一



第九十四卷 文苑

李夢陽何景明徐禎卿邊貢鄭善夫列傳第七十

二

第九十五卷 文苑

康海楊慎桑悅顧璘朱應登劉麟文徵明唐寅祝

允明列傳第七十三

第九十六卷 文苑

李攀龍七子三甫汪道昆列傳第七十四

第九十七卷 文苑



高啓四傑五先生袁凱林鴻列傳第七十五

第九十八卷

文苑

太白山人盧柟徐渭列傳第七十六

第九十九卷

循吏列傳第七十七

第一百卷

能吏列傳第七十八

第一百一卷

廉吏列傳第七十九



第一百二卷

久任吏列傳第八十

第一百三卷

教職列傳第八十一

第一百四卷

掾吏列傳第八十二

第一百五卷

序列傳第八十三







不污勝國一命赫然一怒天與人歸臣竊相提而論  
昔開基建極之主得國之正未有盛於我明者也桀  
至亡道也斲痛其國人止耳未夷其俗也秦人坑儒  
書禍至酷矣而猶中國諸侯王也元以大羊之族入主  
我中華視我冠裳裂我人紀天地倒置且百年我大  
起黃地而再造之汎掃妖氛重開日月以斯不建百  
上制耻魯漢足云哉謹拜手颺言而作開國紀

帝先勾容人也姓朱大父始渡淮居泗州父復徙鍾離  
生鍾離之東鄉毋東生四子帝季子也初帝



坊夢一道士修髯黃冠朱衣象簡授一白丸吞之遂生  
帝帝生之夕有白氣自東南貫室是爲元天曆元年九  
月丁丑日也帝爲孩時多疾父欲以帝捨身釋氏而坊  
未之許帝年十七伯兄與父相繼歿父歿三日而叔兄  
又卒又十三日而母卒帝窘甚里人劉繼祖予之地始  
獲寔即今皇陵乃是時帝與仲兄二人影相弔也而  
其年又大侵兄度無與俱存抱帝泣遂它往帝乃行降  
姬爲禮里僧高彬入皇覺寺居焉寺僧常見帝室夜有  
紅光竊異之居兩月寺僧又各以歲之不易散糊口於



四方帝乃出遊金斗西抵光息北至潁川崎嶇二載乃  
歸歸而寺僧逃死盡矣帝則時時出往濠城遊城中有  
士善相人指帝語人曰此非凡人帝聞士言益恐僞自  
避匿不敢更入濠城里居四載為至正辛卯是時潁人  
劉福通起潁州黃巖人方谷珍起明州蕭人李二起徐  
州羅田人徐燾輝起蘄州四方嚮應其明年郭子興亦  
起濠州是時帝年二十有五矣帝見濠亂欲逃去問玠  
仰藍神卜欲去去弗許欲晉晉弗許三四卜不應帝詫  
而太官曰神豈許我從戎而昌乎玠從之帝滋訝之聞



又卜又從之帝心私自喜遂仗劍入濠城城門人將不利於帝或以語郭子興子興出見帝大驚異遂留麾下時時與帝語益異帝遂以馬公女配焉馬公宿人截命定遠與子興友善故以女托子興子興字之如已女而帝遂以館甥掌征討事矣其後元人破徐州李二走死其將彭早住趙均用走濠梁濠中有四帥相與其下之而二將遂稱王子興故與諸帥隙諸帥因挾二王執子興囚之帝先以子興命出將兵於外聞之還集諸健兒殺諸帥篡子興去諸帥懼乃請二王釋子興帝與子



興還歸故里而里中諸少年相從者又數百人子興又引數百人出獻諸帥復爲二王挾而東翩翩泗上久之帝心弗善也乃與徐達湯和花雲等二十四人南畧定遠定遠有寨三千人號驢牌兵帝與騎士費聚往招之寨帥獻以牛脯帝解佩囊以要成旣而帥悔之帝誘而執之遂降其屬三千人夜襲橫澗山復得民兵二萬人教練之軍始振是年七月遂取滁州定遠人馮國用與其弟國勝謁帝妙山言于帝曰金陵龍蟠虎踞其帝王都也願先拔金陵定鼎然後命將四征掃除群寇救生



靈於水火勿貪子女王帛倡仁義以收人心天下不難  
定也帝悅留侍宿衛李善長者亦定遠人年四十一矣  
伏謁道旁帝曰長者也降容待之與語移日帝未嘗不  
稱善也以爲記室伯兄子又正姊子李文忠先逃亂與  
帝失皆復來而仲嫂亦携其幼子至帝益大喜子興於  
是亦將所部萬人來滁見帝軍容而大悅遂欲據滁而  
王帝曰所貴於王都爲其形勢便人民衆而財利集也  
滁無百雉之規在四山之中舟楫之所不通商旅之所  
不至無河山之險可恃無周年之粟可固王不亦難乎



子興不悅元人攻六合六合人來告急子興先與其帥  
隙弗欲往帝曰滁與六合編齒而城六合受圍無救必  
斃苟無六合是無滁也柰何棄之是時元兵號百萬子  
興恐屬帝禱而行帝曰可否斷自吾心禱無與焉吾救  
六合以自存也弗救將與俱亡雖禱何益遂與耿再成  
往壘瓦梁守之壘垂陷而復完元兵疑帝令瓦梁男子  
入而卷舍婦人手罵元師元師駭我列而出元人不  
敢前遂翼瓦梁民遷之滁州元兵因復至滁帝使耿再  
成出城與戰佯敗而誘其深入我師伏于城之外澗特



之元師渡澗遂大敗之自是元人不敢窺滁而子興之  
在滁也帝數與之決事不聽帝病之議事多不出滁糧  
匱子興憂之召帝再三帝乃往問欲謀所向帝曰困守  
孤城誠非計今惟和陽可圖然其城小而堅可以計取  
難以力勝乃令張天祐將兵三千人椎髻而衣青衣駕  
四橐駝馳而往給言廬州兵護元使者往和陽犒將士  
繼使耿再成將絳衣兵萬人乘之約已定天祐兵至陟  
陽陟陽人信以爲元使者留關上勞之牛酒飲食之遂  
愆期再成不知天祐之未至也鼓而前和陽人閉門縋



元兵拒我再成敗走元兵追之一舍天祐兵始至因逐擊之及于城下湯和奪橋而先登遂入和州帝聞再成敗急與徐達將三千人往援而天祐兵已入矣帝乃入撫其民而定之子興於是屬帝總兵和陽而諸將多子興貴部曲皆顧望不肯下帝然卒畏帝謀斷無能出帝右者又不敢爲異子興有二子亦忌帝置毒酒召帝帝覺遂不敢復至子興所亡何子興卒二子不能有其軍帝乃代將其軍而常遇春胡大海鄒愈趙德勝等皆來從帝衆已十餘萬人矣其年劉福通復立韓山童之子



韓林兒帝亳州國號宋改元龍鳳檄推子興之子爲帝  
元帥帝爲左副元帥張天祐爲右副元帥帝曰大丈夫  
寧能受制於人耶不受也然帝檄召四方皆稱龍鳳從  
宋故是時泰州人張士誠跨淮浙而王僞號周徐壽輝  
之將沔陽人陳友諒虎視湖南兩人皆江南勍敵而四  
方千人聚者不可勝數帝欲渡江取金陵不可得舟方  
憂之而巢湖人俞廷玉廖永安趙伯仲合肥人張德  
葉昇無爲人桑世傑含山人華高等先結舟師自保湖  
中於是來約降帝大喜曰天贊我矣遂親至湖上納之



而是時廬人左君弼梗途廷王諸舟不能出元將蠻子  
海牙又扼之馬腸河口會大雨帝帥廷王等間道漲流  
而東遂至和陽帝旣得舟而諸將遂欲直趨金陵帝曰  
金陵長江天塹未易猝攻采石南北之喉噤不如先取  
采石越其天險乃可徐議金陵采石克則太平危我館  
穀于太平正告四方旣包兩溟蕪湖然後策騎而東則  
舟師不煩金陵可唾手有也諸將曰善遂令李善長且  
約束帝臨江而誓之曰天厭元德欲訖其命久矣惟是  
元元可憫予故不憚征繕順天意以拯民艱爾衆今日



渡江毋貳爾心毋違予命毋妄殺人毋畧人子女毋焚  
人廬舍毋幽人財物有不用命予拏戮汝毋赦六月朔  
適有風起于西北因風遂達牛渚常遇春先以一戈登  
采石潰循江諸壘皆潰遂至太平太平守者皆逃者儒  
李習陶安帥父老迎帝于郊外安既見帝謂習曰龍姿  
鳳質非常人也吾儕有主矣帝問安曰足下有何高見  
教我乎安曰方今四海鼎沸豪傑並爭攻城屠邑互相  
雄長志皆在于子女玉帛非有撥亂收民安天下之心  
明公率衆渡江神武不殺人心悅服以此順天人行弔



伐天下不足平也帝曰吾心也吾取金陵何如安曰金陵古帝王之都據之以臨四方何向不克帝悅晉安參幕府改太平路爲太平府以李習知府事置太平興國翼元帥府諸將奉帝爲大元帥帝命李善長爲帥府都事潘庭堅爲帥府教授汪廣洋爲帥府令史時江東四面皆元兵方山寨帥陳瑄先因集民兵數萬寇太平帝遣徐達湯和大破其衆褻城橋禽瑄先帝見而釋之瑄先曰公能禽我不能殺我有說乎帝曰君知天下之時勢乎昔武王伐殷而孟津之會者八百惟知時也君何



情焉。堃先曰：公欲吾軍降乎？易爾軍中諸帥皆吾故親。吾爲公以書招之。堃先書陽若招之，而陰寔激之。不虞諸帥得書，皆遽降。堃先悔自失，私與其部曲謀叛去。帝欲殺之，恐失豪傑心，與語曰：人各有心，吾不能汝強也。從吾惟汝從，元惟汝縱之去。我師克溧陽，堃先遁於南臺。御史大夫福壽拒我秦淮水上，我師失利。堃先追襲我漢陽，過葛山，葛山民惡之，刺殺之。我師遂克蕪湖。丙申三月，克金陵。元御史大夫福壽死之。帝諭諸父老曰：元失其政，干戈四起，汝民塗炭，朝夕惴惴，不能自保。吾



所以來爲汝民除亂汝其各安職業毋懷疑懼賢人君子有能從予立功名予禮用之居官慎毋暴橫以殃吾民舊政有不便民者予爲汝除之民大喜夏煜孫炎楊憲等皆名士皆錄用之改集慶路爲應天府置江南行中書省李善長等奉帝爲共國公帝以李善長宋思顏爲參議李夢庚郭景祥爲左右司卽中候原善楊原杲陶安阮弘道爲員外郎孔克仁陳善吾王愷爲都事王瑄爲照磨樂鳳爲管勾夏煜歸子魯爲博士置行樞密院以元帥湯和攝同僉樞密院事置帳前總制親兵都



指揮使司以馮國用爲都指揮使置左右前後中五翼  
元帥府以花雲唐勝宗陸仲亨鄧愈陳兆先等爲元帥  
使徐達下鎮江置鎮江翼以徐達湯和爲鎮江翼元帥  
降元將康茂才定遠人王弼自三壘山來歸洛陽人秦  
元之年八十餘矣僑居鎮江帝聞令徐達禮致之稱爲  
老先生嘗手書濂簡問答而左右不知也元之復薦金  
陵人陳遇帝遣儒士楊憲通好張士誠貽之書曰昔隗  
囂據天水以稱雄足下今王于姑蘇吾深爲足下甚吾  
與足下東西境也睦鄰守國保境思民古人所貴吾甚



慕焉自今以後通使往來毋惑于交構之言以生邊釁  
憲至士誠晉不遣尋侵我鎮江帝曰吳人生心於我矣  
我當先取毗陵以沮之士誠遣弟張九六率衆數萬來  
援達使鐵騎刁國寶逆之于常熟覆其師禽九六士誠  
奉書于帝乞和弗許帝數之以其挑兵之釁也使歸楊  
憲不報帝益達兵二萬人往助達毗陵人復誘我長興  
兵七千人叛去困達牛塘常遇春廖永安胡大海各將  
兵外至夾擊之乃大破之丁酉三月克毗陵遂圍寧國  
常將軍中矢還帝乃自往監戰破之獲元將朱亮祖亮



祖六安人爲元義兵元帥帝初克太平時亮祖以其屬  
來降帝賞以銀帛令不失元授居數月叛去數與我戰  
我遺之俘者六千人諸將之勇者皆遜避於是獲千城  
上帝謂曰還何如乎對曰事非已生則力焉死則死矣  
帝壯之授三鐵簡生之使將其屬隨征其年我師遂舉  
長興江陰帝令湯和守常州耿炳文守長興吳良守江  
陰吳驕不敢東因定徽池揚嚴四州地張士誠不能得  
志於我降于元戊戌正月帝召徐達還守金陵自將親  
軍楊璟等帥兵十萬取浙東道徽州召儒士唐仲實姚



建等啓民瘼召前學正朱升升獻三言高築墻廩積糧  
緩稱上帝悅命知帷幄十二月甲申克婺州有侍人掠  
于塗斬之徇師改婺州路爲寧越府以儒士王宗顯知  
府事以總管陳從貴知東陽以元帥呂兼明知永康以  
總管王道同知義烏楊苟知我義置行中書分省徵王  
禕爲省掾召儒士許元葉璿王胡瀚汪仲山等十餘人  
會食省中口令二人進講經史開郡學延儒士宋濂葉  
儀爲五經師戴良爲學正吳沉徐原爲訓導絃誦之聲  
始聞樂平儒士許瑗走婺州謁帝曰方今元祚垂盡四



沸豪傑士勢不獨安夫有勇略者乃可馭雄才有  
奇識者然後能知奇士閣下今欲掃除僭亂平定天下  
非收攬英雄難與成功帝曰子方饑渴公等授瑗博士  
已而曰太平吾股肱郡命爲知府己亥正月取諸賢使  
儒士陳顯道往招方國珍國珍私與其下謀欲勿與我  
不能與我爭衡與我四方之變未可知乃奉三郡來款  
使一子入質提空名鄉我而北通擴廓南交陳友定以  
厚自託帝亦知其詐也禮其子遣還時方戒心淮漢弗  
問也六月帝還建康九月克衢州龍泉守將胡深以處



州降青田人劉基浦江人宋濂龍泉人章溢麗水人葉琛皆浙東名士胡大海以四人薦帝帝徵四人偕至金陵入見帝大喜曰予爲天下屈四先生築禮賢館館之帝時至館賜坐諮時政以基爲參謀以濂爲儒學提舉以溢與琛爲營田司僉事帝得四人日與共計天下大事庚子陳友諒陷太平太平院判花雲知府許瑗死之友諒遂弑其主徐壽輝而自立爲帝國號漢使使與張士誠連和欲犯建康建康人恐或勸帝先復太平紓國急帝曰太平吾新築壘也固若友諒陸來攻我其能得



忘我乎其城西南隅寔瞰姑溪日友諒以巨艦乘城故  
援我今騎無所用之臨之舟師彼舟十倍我上流禦我  
我能與之決勝乎或勸帝爲泣師必克之帝曰我出彼  
以偏師綴我以舟師順流而東達建康半日耳我以步  
騎還百里奔命不已左乎語康茂才曰吾有一策可破  
敵非汝不可汝能之乎吾聞汝與友諒有舊友諒必無  
虞汝吾欲汝速之來佯爲叛我許之以應其內給分三  
道兵以弱其外友諒得汝之約則必來來吾自取之矣  
茂才曰吾家有老閹舊嘗事友諒吾令齎吾書以往友



諒必來無疑也帝以告善長善長以爲誘敵不可帝曰  
非汝所知失今不取患將深二虜若合吾何以支破此  
東寇膽落矣使胡大海往擣信州曰信州漢之門戶吾  
伐之聊以繫其一足使常遇春馮國勝帥五翼軍伏石  
灰山下徐達一軍伏南郭楊璟一軍伏大勝張德勝一  
軍伏龍江關外帝將大軍伏廬龍山下戒諸將曰吾赤  
幟舉于山之右汝當知寇至吾黃幟舉于山之左汝伏  
軍盡出於是諸軍戒嚴閏五月乙丑友諒果帥大師而  
東以爲建康可旦夕下也至則與康茂才之約大相失



急趨龍江柵江上自守帝令山右舉赤幟告諸軍時  
暑甚軍士皆流汗帝衣紫茸甲張蓋命去蓋同暴日中  
衆皆欲戰帝曰天將雨我軍且就食卒食乘雨擊之無  
莫之信頃臾雨大注帝麾我軍競進墮柵漢軍爭之兩  
軍合戰雨止帝令山左復舉黃幟我伏軍盡出漢軍見  
之大驚恐遂棄柵走舟舟當潮退皆膠殺溺死者殆萬  
人友諒急駕小舟逃去我軍追至慈湖大破之及采石  
又破之我將張德勝死焉友諒遂棄太平走江州我降  
其將張志雄志雄言帝曰友諒初率大軍而東皆安慶



之銳卒也今盡降安慶之守墮矣帝趣俞伯仲攻之遂克之使伯仲守焉而胡大海信州之捷亦至帝使其子胡德濟戍之辛丑二月沛人薛顯以泗州降帝嘉悅授顯指揮使方國珍以金玉飾馬鞍轡來獻帝却之曰吾所需者文武材能所用者穀粟布帛寶玩非吾好也七月僞漢將張定邊陷安慶俞伯仲亡歸帝怒欲誅之常遇春請曰伯仲渡江勛舊願貸其死帝曰身爲主將旣不能守又不能死吾能爲若免誰爲吾守解弓絃賜自盡以其弟庸嗣職他日帝語諸將曰陳友諒凶德無厭



嗟我疆場隕我名將不自悔于厥秉旂陷我安慶其  
實已盈可殪也我必伐之徐達曰師直爲壯曲爲老彼  
曲已甚我伐之必克之劉基曰夜觀天象金星在前火  
星在後其勝師之兆乎遂與達等帥舟千艘載甲七十  
萬泝流西上有萬鳥群挾帝舟而飛一龜一蛇浮疑枕  
後帝異之抵皖城一鼓空其水寨小姑守將丁普郎傳  
友德迎降長驅至江州漢師三戰三北友諒夜走武昌  
帝入江州因徇蘄黃興沔皆下之還師復下安慶是時  
江西諸郡爲漢拒守帝復分遣招諭於是江西行省僞



丞相胡廷瑞遣其部將以龍興來詣降約毋散其部屬  
帝以書報慰勞之官之如其舊十月帝使都事汪河如  
元以通察罕帖木兒之好且觀兵也壬寅正月帝如龍  
興恤孤寡賑乏困弔瘡痍放西山之拳鹿築臺龍沙之  
上召父老集臺下諭曰自古攻城畧地鋒鏑之下民罹  
其殃爾民獲保骨肉安生理則爾丞相胡廷瑞灼見天  
道先幾來歸爲爾民之福爾民苦爲陳氏魚肉久矣今  
吾悉去其弊軍需供億不爾煩勞爾民各安本業毋游  
惰毋作非爲以陷刑辟各保爾父母妻子爲吾良民不



亦可乎民間之大悅改龍興路爲洪都府以葉琛知府  
事以鄧愈爲江西行中書省叅知政事鎮南昌二月帝  
還建康南昌降將祝宗康泰叛殺知府葉琛愈出走復  
命徐達擊定之使都督朱文正統元帥趙德勝等協愈  
還鎮六月賊殺元平章察罕帖木兒元代之以其甥擴  
廓其明年正月擴廓修好于我我使汪河往報晉焉是  
月明玉珍自帝于成都國號夏三月吳人入安豐殺劉  
福通小明王來奔帝引徐達常遇春等擊吳師安豐吳  
師遁帝還晉徐達圍廬州七月陳友諒自帥舟師六十



萬寇洪都帝曰吾爲一廬州而失江西豈計之得乎命徐達解圍還救帝謂諸將曰友諒之敗屢矣今又來是天奪其魄而速之亡也吾當親往舟師凡二十萬俱發至則一軍軍涇江一軍軍南湖一軍軍武陽是時洪都不解八十日矣友諒出逆我師鄱陽湖我師旣至康即山徐達遇其前軍擊殺千五百人奪一舟軍大振漢將張定邊犯帝舟帝舟膠牙將韓成死之帝乃歛軍令徐達還建康虞友諒之襲建康也明日巳丑友諒以前軍因野戰故不利乃聯巨艦爲陣彼舟大我舟小我師



固受敵士徒多劒院判張志雄丁普卽皆戰死普卽喪其元猶執戈而植帝斬隊長十餘人厲師郭興進曰我師非不用命也舟之小大不敵也此非火攻不可帝然之明日帝令敢死士七人操七舟舟前多縛草爲人各戴堽蓋持戈盾舟中皆載蘆葦而繫一小舸于後奮東比風起乘風直逼敵陳漢軍望之以爲我舟敢死與戰至則火具大發漢軍猝不及禦風迅矣烈戰艦皆燃而七人者皆從小舸逃還其僞王陳友仁陳友貴平章陳普略俱燔死友仁卽所謂五王湫一日多知數友諒之



出是師也友仁寔主之於是死友諒因遂喪氣咨於左  
右金吾二將軍謀遁歸右金吾將軍曰今戰不勝出湖  
寔難不如焚舟登陸直走湖南謀爲再舉左金吾將軍  
曰今雖不利以我之衆猶能借一若其僂力徼天之幸  
尚未可知何至焚舟示弱萬一舍舟登陸或邀于前或  
躡于後衆將懼盡何能再舉與其又敗不如戰也友諒  
從之友諒覺帝舟獨白櫓諭其下明日必并力帝聞夜  
令諸舟皆白櫓及旦漢師莫能辨則大駭連日與我戰  
皆大敗漢艦高數丈戰士三重我殺其士殆盡操舟者



猶跡號蕩艫不知也俞通海廖永忠汪興祖趙庸等帥  
大舟繞漢師深入亦繞而出漢不能師友諒嘆曰吾悔  
不從右金吾之言左金吾聞之懼遂來降於是右金吾  
亦降友諒失此二人益大窘歛師自保不復敢戰我屢  
致之不出我師泊左蠡友諒泊瀕磯相對壁三日帝移  
之書曰方今取天下之勢同討夷狄以安中國是爲上  
策結怨中國而厚夷狄是爲無策曩者公犯池州吾不  
以爲嫌生還俘虜將欲與公爲約從之舉各安一方以  
俟天命此吾之本心也公失此計乃先與我爲仇我是



以破公江州遂蹂躪黃漢沔之地因舉龍興十一郡奄  
爲我有今又不悔復起兵端一困於洪都再敗於康山  
殺其弟侄殘其兵將損數萬之命無尺寸之功此逆天  
理悖人心所致也公乘尾大不掉之舟隕兵弊甲與吾  
相持以公平日之強暴正當親決一戰何徐徐隨後若  
聽吾指揮者無乃非丈夫乎公蚤決之友諒怒凡獲我  
戰士晉軍中者皆殺之帝令諸將悉返漢俘傷者予藥  
療之祭其弟侄漢軍聞之以帝之怒其君而能哀其民  
也皆大喜帝計漢師在別久旦暮將自逸先帥諸將出



湖口邀之漢師不出十五日帝再移之書曰辛卯以來  
天下豪傑紛然並起邇來滛虐之徒一掃江淮英雄惟  
存吾與公耳何乃自相吞併公之土地吾已得之縱力  
驅殘兵來死城下不可再得也設使公僥倖逃還亦宜  
修德勿作欺人之寇却帝名而待真主不然喪家滅姓  
悔之晚矣不報友諒在湖日久糧且盡行掠都昌不能  
得遂率大帥趨南湖嘴欲奔我軍在南湖者過之不能  
去遂突湖口帝麾諸將邀擊之湖口順流搏戰至涇江  
涇江軍又夾擊之漢師大敗鐵冠道人大笑賀帝曰友



諒死矣帝未信三日得降卒言友諒中流矢貫其睛及  
顙果已死張定邊載其屍還走武昌我獲其太子善兒  
漢軍盡降常遇春請遂乘勝追滅帝曰豈不聞覆巢之  
下有完卵乎兵法曰窮寇勿追追之傷人必多且縱之  
歸吾但綴之偏師備其奔逸可矣遂使遇春守之語之  
曰是猶孤純處牢中無所復之矣料彼創殘之餘安能  
再戰困之將自服何患焉是役也將帥死者三十六人  
帝亦瀕危數矣帝謂劉基曰我不當有安豐之行使友  
諒乘我之出京城空虛順流而下建康我進無所成退



無所歸大事去矣今友諒不攻建康而圍南昌此計之下者不亡何待乃知天命自有歸也漢亡天下不足定矣九月壬申帝還建康是月張士誠自立爲吳王張定邊復立友諒之次子理保武昌甲辰正月李善長徐達等勸進帝不允固以請固辭乃奉帝爲吳王帝以李善長爲右相國徐達爲左相國常遇春俞通海爲平章政事汪廣洋爲右司郎中張昺爲左司郎中劉基爲太史令二月帝出視師武昌漢城守帝不欲趣兵思得一儒生往說之漢故臣廬陵羅復仁請願行與帝約曰主上



既推好生之德惠此一方若使陳氏之孤得保首領而臣不食言臣死無憾帝曰予兵力非不足所以久駐此者實冀其自歸免傷生靈耳汝行予不汝悞於是復仁往號于城下理驚召入相持痛哭哭止問故復仁以帝意白是月癸丑理銜壁肉袒率太尉張定邊等出降理詣轅門蒲伏不敢仰視帝起挈其手曰予不爾罪勿自懼也命士卒毋得入城城中安堵如故置湖廣行中書省以樞密院判楊璟爲參政三月乙丑帝還建康丙寅封理爲歸德侯江西行省以故漢鏐金床進帝曰是



異於孟昶七寶溺器乎宜其及也燬之令建忠臣祠  
郎山以祀鄱陽湖諸臣之死敵者令徐達取廬州盡  
湖南未下州郡令常遇春徇江西饒鼎臣先陷我吉  
安走死安福熊天瑞守贛州攻下之行抵南安招諭  
雄韶還師西復下襄陽及安陸漢地皆平大閱將士  
勞賞有差十月入淮克海安攻泰州先是張士誠聞  
我已平漢則大恐及是大集舟師范蔡港江陰水將  
使人來言于帝帝使諭達曰寇之陳師江上未必敢  
沂上流徒疑我耳我若分軍往備則備多而力分恐  
寇得嚙吾虛而乘



我彼亦一計也我按諸軍毋動寇徘徊江上當自老我克泰州彼不戰皆潰矣是月克泰州果自潰達送所俘卒五千人至帝處之潭辰二州人予衣一襲皆呼萬歲而去達乘勝至高郵帝不欲達深入令還軍泰州遣馬勝圍高郵高郵人詐降勝信之夜遣康泰五千人踰城入高郵人殺之始士誠由高郵嘯聚以有吳越故高郵人堅與城守帝聞勝失利乃趣達往士誠復遣左丞徐義率兵由海道入援帝知義兵無律無能爲且聞高郵城守兵不能過五千令達分兵二州軍二萬自取之



別駕他將取淮安及興化丙午三月克高郵淮安守  
楊思祖以淮安降四月克興化帝曰吾得淮安已足保  
障江淮控制齊魯何憂中原哉是時吳將李濟據濠州  
帝念濠爲家鄉不忍輒加兵命李善長貽書招濟濟不  
答帝乃命江淮行省平章韓政攻之濟乃降甲子帝如  
濠州省陵墓置守者二十家復之世世無有所與濠州  
父老來見帝宴之曰吾與諸父老不相見久矣今還故  
鄉念父老鄉人遭罹兵難以來未遂生息吾甚憫焉父  
老對曰久苦兵爭莫獲寧居今賴主上威德各得安息



勞主上憂念帝曰濠吾故鄉父母墳墓在焉吾豈得忘  
諸與宴飲極歡及帝欲去諸父老固請留帝曰父老皆  
吾故人豈不欲朝夕相見然吾不得久留此父老歸宜  
教導子孫爲善立身孝弟勤儉養生鄉有善人由家有  
賢父兄也諸父老皆頓首謝帝曰鄉人耕作交易且令  
無遠出濠淮諸郡尚有寇兵恐爲抄掠父老等亦宜厚  
自愛以樂高年於是諸父老頓首拜辭而去元徐州守  
將樞密院同知陸聚以徐宿二州來降帝甚喜以聚爲  
江淮行省參政仍守徐州五月帝至自濠遂欲議取浙



西李善長曰張氏執雖屢屈兵力未衰土沃民富文多  
積儲恐難猝拔宜候隙而動帝曰彼今長淮東北之地  
已爲我有吾以勝師臨之何憂不拔敗形已露何待觀  
隙徐達曰張氏久驕橫暴殄已極此天亡之時也其將  
如李伯昇呂珍之徒皆齷齪無足數惟擁兵將爲富貴  
之娛耳其居中用事者黃蔡葉三參軍迂濶書生不知  
大計臣奉主上威德率精銳之師聲罪致討三吳可計  
日定也帝喜顧達曰諸人局於所見獨汝合吾意予師  
二十萬授以大將軍率諸將伐吳師將發帝問諸將用



師孰先常遇春對曰逐梟者必覆其巢去鼠者必熏其穴今當直擣姑蘇破姑蘇他郡可不勞而下帝曰不然士誠起塩販與張天騏潘原明等相手足士誠苟至窮蹙天騏輩懼俱斃必併力救之今不先分敵勢遽擣姑蘇若天騏出湖州原明出杭州援兵四合難以取勝莫若先攻湖州使彼疲於奔命羽翼既披然後移兵姑蘇取之必矣復遣人馳諭朱文忠令總水陸之師下浙江帝謂達曰予聞張士誠毋堊姑蘇城外汝至憤無侵毀張氏全城歸命不勞吾師吾必全之若用師得之務生



其將士撫其人民毋恣屠戮師至太湖與吳師大戰毗  
山大敗之遂乘勝至湖州湖州參政黃寶出遇遇赤與  
戰寶敗走遇春追獲寶城下我師進薄城下右丞張天  
驕院判陶子寶勅與寶約分道禦我見寶敗則皆歛兵  
乘城士誠復恐張天驕有失遣司徒李伯昇潛由荻港  
入城與俱守遣其五太子與平章朱暹同僉呂珍引兵  
六萬號二十萬屯舊館分五砦爲外應我乃進軍東阡  
聯十壁逼之塞溝港絕其糧道士誠恐復遣其壻潘原  
紹與右丞徐義共統赤龍船親軍集平望與舊館相聲



援我師竊出間道襲焚其赤龍船追擊至昇山五太子引舊館兵援昇山我與大戰昇山下大敗之五太子懼不免與呂珍朱暹皆降達徇呂珍城下使諭李司徒李司徒泣曰張太尉養我厚我不忍背欲自刎左右抱持得不死左右泣曰大人久困城中援絕執孤不如降也伯昇俛首不能言與張天驕俱降其月李文忠帥師至杭潘原明亦降而嘉紹諸州郡聞風皆下矣我師直抵姑蘇環城四面攻之達軍葑門節子興軍婁門葦雲龍軍胥門湯和軍閭門王弼軍盤門張溫軍西門康茂才



軍北門耿炳文軍城東北隅仇成軍西南隅何文輝軍  
西北隅常遇春軍虎丘九月不能下帝遺之書曰成  
湯放桀武王伐紂漢祖滅秦歷代帝王之興兵勢相加  
乃爲常事當王莽之亡隋之失國豪傑乘時蠭起圖王  
業據土地及其定也惟歸于一天命所在豈容紛然雖  
有智者事業弗成亦當革心畏天順民以全身保族若  
漢之竇融宋之錢俶是也自古皆然非今獨異爾能順  
附其福有餘毋爲困守孤城危其兵民自取敗亡爲天  
下笑士誠不報其年夏王明昇遣使來聘帝命參知政



事蔡哲往報哲繪其山川險易還獻帝覽而嘉之十二月帝命以明年爲吳元年立宗廟社稷建宮闕吳元年二月免太平應天鎮江租賦有差三月定文武科取士之法相國李善長率群臣勸進帝曰予功未覆於天下德未孚於人心一統之執未成四方之塗尚梗遽稱大號未協輿情自古帝王之有天下知天命之有歸察人心之無外猶且謙讓未遑以俟有德常笑陳友諒初得一隅妄自稱尊志驕氣盈卒致亡滅貽譏于後予豈得更自蹈之若天命在我固自有時無庸汲汲也六月士



誠自出盤門泣戰敗溺沙盆潭幾不救與入城殊自失  
李伯昇遣客欲說之客詣門求見士誠召入問曰爾欲  
何言客曰吾爲公言興亡禍福之計也願公安意聽之  
士誠曰何如客曰公知天數乎昔項羽暗啞叱咤百戰  
百勝卒敗垓下天下歸于漢祖何也此天數也公初以  
十八人入高郵元兵百萬圍之此時如虎落阱中死在  
朝夕一旦元兵潰亂公提孤軍乘勝攻擊東據三吳拓  
地千里甲士數十萬南向稱孤此項羽之勢也誠於此  
時不忘高郵之危苦心勞志收召豪傑度其材能任以



戰事撫人民練兵旅御將帥有功者賞敗軍者戮使號  
令嚴明百姓樂附非特可保三吳天下可取也士誠曰  
足下此時不言今復何及客曰吾此時雖有言亦不得  
聞也何也公之子弟將帥親戚羅列中外錦衣玉食歌  
妓舞女日夕酣宴身衣天下至美口甘天下至味猶未  
厭足提兵者自以爲韓白謀畫者自以爲蕭曹敖然視  
天下不復有人當此之時公深居於內敗一軍不知失  
一地不聞縱知之不問故淪至今日士誠曰吾甚恨無  
及然則今當何如客曰吾有一策恐公不能從也士誠



曰不過死耳客曰使死有益於國家有利於子孫死固  
當不然徒自苦耳且公不聞陳友諒乎踰有荆楚兵甲  
百萬與江右之兵戰于姑熟墜于鄱陽陳友諒舉火欲  
燒江右之船天乃反風而焚之友諒身敗身喪何則天  
命所在人力無如之何且今攻城益急公特湖州援湖  
州失嘉興援嘉興失杭州援杭州又失獨守此尺寸之  
地誓以死拒然竊慮執極患生猝有變從中起公此時  
欲死不得生無所歸故竊以爲莫如順天之命自求多  
福令一介之使疾走金陵稱公所以歸義救民之意公



開城門幅巾待命亦不失爲萬戶侯况嘗許以寶融錢  
俶故事耶且公之地譬如博者得人之物而復失之何  
損士誠仰首沉慮良久曰足下且休待吾孰思之然卒  
狐疑莫能決也數日其弟士信張幙城上踞銀椅與參  
政謝節會食左右方進桃未及嘗我軍飛礮碎其首士  
誠大忿自率將士出芥門索戰鋒銳甚我師爲稍却故  
漢將熊天瑞我攻湖州時叛去復爲士誠習礮具以擊  
我師我師多中傷月餘達得諜言其知城中乏困狀以  
是親督將士晝夜亟攻遂破葑門遇春亦破閭門城遂



士誠德督將士巷戰將士多倒戈士誠倉皇從驍騎  
謂妻劉曰我敗且死矣若曹奈何劉曰君勿憂妾必  
負君登齊雲樓自焚士誠距戶經室中李伯昇失戶  
抱解之蘇達令潘原紹諭意士誠閉目不言亦不食  
建康帝欲全之而竟縊死也帝初保有江東頗輕臣  
士誠不敢忘漢與漢戰最勁鄱陽役死者六萬餘人  
即向吳疆吳人不敢嬰姑蘇城守最久死者十萬餘人  
旋帝封李善長爲宣國公徐達爲信國公常遇春爲  
鄂國公改官儀尚左李善長爲左相國徐達爲右相國



其冬帝將有事中原語達等曰自元失其政君昏臣悖  
六戈四興民墜塗炭予與諸公仗義而起初爲保身之  
謀異有莫安生民者出豈意大難不解爲衆所附乃率  
一渡江與群雄相角逐遂平陳友諒滅張士誠闔廣之  
地將以次而定尚念中原擾攘人民離散山東則有王  
二父子徇偷鼠竊反側不常河南則有王保保名雖尊  
實則跋扈擅爵專賦上疑下叛關隴則有李思齊張  
甲迨彼此猜忌孰不兩足且與王保保互相嫌隙元之  
制亡其機在此今欲命諸公北伐計將如何迺春對曰



今南方已定兵力有餘直擣元都以我百戰之師敵彼  
久逸之卒挺竿而可以勝也元都既克破竹之勢乘勝  
長驅餘皆建瓴而下矣帝曰元建都百年金城鞏固如  
卿所言懸師深入不能即破頓於堅城之下餽餉不繼  
援兵四集進不得戰退無所據非我利也吾欲先取山  
東撤其屏蔽旋師河南斷其羽翼拔潼關而守之據其  
戶檻天下形勢入我掌握然後進兵元都則彼執孤援  
絕不戰可克既克元都鼓行而西雲中九原可席卷下  
之矣諸將皆曰善十月甲午以中書左丞相信國公徐



達爲征虜大將軍平章軍國重事鄂國公常遇春爲征  
虜副將軍帥甲士二十五萬北定中原諭諸將曰汝諸  
將非不健闘然能持重師有紀律戰勝攻取得爲將之  
體者莫如大將軍達當百萬之衆勇敢先登摧鋒陷陳  
所向披靡莫如副將軍遇春然吾不患遇春不能戰但  
患其輕敵耳吾前在武昌見遇春遇數騎挑戰卽輕身  
赴之彼陳氏如張定邊者何足稱數尚據城指揮遇春  
爲大將顧與小校爭能甚非所望宜戒之若臨大敵遇  
春須領前鋒敵勢強則遇春與參將馮宗異分左右翼



各將精銳擊之右丞薛顯參政傅友德皆勇略冠諸軍  
可各領一軍當一面或有孤城小敵遣一將有膽略者  
付以總制之權皆可成功達則專主中軍策勵群帥運  
籌決勝不可輕動古云將在軍君不與者勝汝等識之  
諭達曰閫外之事汝定任之茲行必自山東次第進取  
山東古云十二山河之地師行須嚴部伍明分數一衆  
心審進退之機適通變之宜戰必勝攻必取我虛而彼  
實則避之我實而彼虛則擊之將者三軍之司命立威  
者勝任勢者強威立則士用命勢重則敵不敢犯吾與



諸豪傑並馳觀其取敗者未有不由威不立而勢輕也  
汝其慎之是日上親祭上下神祇復大諭諸將士曰師  
行非必畧地攻城要在削平禍亂安生民也爾等勿妄  
殺人勿奪民財勿毀民居勿廢民農具勿殺民耕牛勿  
掠民子女民有遺棄孤幼存恤還民父母親戚此皆陰  
隲美事好共爲之檄諭齊魯河洛燕趙幽薊秦晉之人  
曰自古帝王臨御天下中國居內以制夷狄夷狄居外  
以奉中國未聞以夷狄居中國治天下者也自宋祚傾  
移元以比狄入主中國四海內外罔不臣服此豈人力



實乃天授然達人志士尚有冠履倒置之歎自是以後  
元之臣子不遵祖訓廢壞綱常有如大德廢長立幼泰  
定以臣弑君天曆以弟鵠兄至於弟收兄妻子烝父妾  
上下相習恬不爲恠其於父子君臣夫婦長幼之倫壞  
亂甚矣夫君人者斯民之宗主朝廷者天下之根本禮  
義者御世之大防其所爲如彼豈可以爲訓於天下後  
世哉及其後嗣淫荒失君臣之道又加以宰相專權憲  
臺報怨有司毒虐於是人心離叛天下兵起使我中國  
之民死者肝腦塗地生者骨肉不相保雖因人事所致



寔天厭其德而棄之之時也古云胡虜無百年之運驗之今日信乎不謬當此之時天運循環中原氣盛億兆之中當降生聖人驅逐胡虜恢復中華立綱陳紀救濟斯民今一紀于茲未聞有濟世安民者徒使爾等戰戰兢兢處于朝秦暮楚之地誠可矜憫方今河洛關陝雖有數雄忘中國祖宗之姓反就胡虜禽獸之名以爲美稱假元號以濟私恃有衆以要君阻兵據險互相吞噬反爲生民之巨害皆非華夏之主也予本淮右布衣因天下亂爲衆所推帥師渡江居金陵形勢之地得長江



天塹之險今十有三年西抵巴蜀東連滄海南控閩越  
湖湘漢沔兩淮徐邳皆入版圖奄及南方盡爲我有民  
稍安食稍足兵稍精控弦執矢目視我中原之民久無  
所主深用疚心予恭天成命罔敢自安方欲遣兵北逐  
群虜拯生民之塗炭復漢官之威儀慮民人未知反爲  
我讐望家北走陷溺尤深故先諭告兵至民人勿避予  
號令嚴肅無秋毫之犯歸我者永安於中華背我者自  
竄於塞外蓋我中國之民天必命中國之人以安之夷  
狄何得而治哉爾民其體之如蒙古色目雖非華夏族



類然同生天地之間有能知禮義願爲臣民者與中夏之人撫養無異十一月達師渡淮王宣父子遣人佯納款達至沂州宣乃閉門拒守陰令子信出募兵莒州達趣攻之宣度不能待信降達復遣使持宣書招信信殺之乃戮宣遂拔益都克濟南盡下山東諸郡其月湯和以征南將軍往討方國珍方國珍亡入海帝命廖永忠復率舟師會和並進國珍懼乃乞降遂定台溫慶元三郡以國珍爲廣西行省左丞居京師胡廷瑞以征南將軍往定八閩兵度杉關克邵武帝遂詔和航海襲福州



取之十二月癸丑左相國李善長等奉表勸進帝曰始予即王位亦不得已勉從衆言今卿等復勸即帝位予德薄不足以當之群臣頓首曰天生聖人以爲民主殿下之即王位天命已有歸矣今若不正大位何以慰天下臣民之望昔漢高帝旣誅項籍群下勸進亦不違其請今殿下除暴亂救生民功塞宇宙德協天人天命所在誠不可違敢固請帝固辭明日善長等復請曰殿下謙讓之德著于四方感于生民願爲天下計早徇群臣之請帝曰中原未平軍旅未息吾意天下大定然後議



此而卿等屢請不已此大事當斟酌禮儀而行不可草  
草數日本善善長等詳定即位禮儀進帝乃許之



皇明史竊卷之第一

開國紀第一下

東莞尹守衡著

戊申春正月乙亥 帝祀 天地于南郊即 皇帝位  
定有天下之號曰大明建元洪武以是年爲洪武元年  
追尊 皇高祖考爲玄皇帝 廟號德祖 妣爲玄皇  
后 皇曾祖考爲恒皇帝 廟號懿祖 妣爲恒皇后  
皇祖考爲裕皇帝 廟號熙祖 妣爲裕皇后 皇考  
爲淳皇帝 廟號仁祖 妣爲淳皇后 冊妃馬氏爲  
皇后立 世子標爲皇太子 大誥天下立大社大稷



于京師定 郊 廟及百神祀典改中書省左右相國  
爲左右丞相李善長爲左丞相徐達爲右丞相章溢爲  
御史中丞群臣請倣元制設中書令尊 太子 上曰  
元人事不師古不足法 太子年未長學未克更事  
多尚當尊禮名儒講習經傳其以廷臣燕東宮秩輔導  
毋庸別設府僚致生異同以李善長爲太子少師燕  
詹事馮勝燕少詹事楊憲傅瓛兼府丞徐達兼太子少傅  
常遇春兼太子少保鄧愈湯和兼太子諭德章溢兼太  
子詹事劉基兼太子率更令禁民胡姓胡服胡語是月



彗星見于昴畢之間先是八閩陳友定守福州聞我師度杉關出延平禦我湯和既入福州下興化遂引兵至延平使使諭友定友定殺使者取血盟諸將勒吏士日夜擊刁斗被甲立不得更畚休士苦之竊踰城自亡和圍擊十日破之械送還京友定嘗殺我胡參軍上詰責之不服誅之友定誅漳泉汀三郡皆來降上詔和還明州授永忠以征南將軍朱亮祖副之使定廣東永忠師度潮州元左丞何真保有循廣遂先遣使迎降上喜授真江西行省參政上初遣師入閩葉令湖廣



平章楊璟兵出湖南進取廣西永忠入廣州海北海南  
諸州聞風皆下師遂西使亮祖前與璟會克靖江永忠  
長驅至邕州師旋上命皇太子與百官出迎勞于  
龍江上之始定廬州元將左君弼不能自顧其毋出  
走於是達師將入汴左君弼守陳州上予君弼書歸  
其毋達至君弼遂來降達因得入汴梁擊定河洛五月  
上幸汴梁欲遂盡召諸將兵還取元都達還謁上汴  
梁七月上還金陵達悉發諸將士渡河河北州郡開  
門而待師次臨清山東諸將各以守土之兵來會元國



公五十八知院上顏帖木兒引兵出禦我師通州大勝  
之其夜元主集群臣語曰朕安能復作微欽啣璧求活  
邪見殿上二狐走出歎曰此天啓朕行乎遂走上都達  
入元都 詔置燕山六衛改爲北平府 詔以汴梁爲  
北京金陵爲南京以春秋往來巡狩人修撰鮑潁曰胡  
主起朔北故都燕天運已改不可因也傳曰在德不在  
險遂止八月甲戌夜天鳴肆大赦嘉與天下更始十惡  
不原 詔大將軍徐達晉都督副使孫興祖守北平以  
常遇春爲副將軍湯和爲偏將軍同大將軍往取山西



九月甲子達師發北平乙丑下保定丁卯下中山乙巳克真定是時馮異守汴梁上復以異爲右副將軍率河南兵出懷慶度太行破婉子關取澤潞元擴廓出馬門覲北平達師直擣太原擴廓聞之還救曰夜襲之擴廓走甘肅邀擊賀宗哲軍於石州敗之崞忻霍絳猗氏平陽等處皆平

二年正月命立功臣廟雞鳴山二月詔修元史三月

達師克奉元詔改奉元爲西安府時蒙古故將李思

齊守鳳翔上貽之書曰昔足下在秦中人以兵衆地



險而從之張思道孔與二皆非勍敵足下當時不能圖  
秦自王已失此機今中原全爲我有向與足下相犄角  
者皆披靡鼠伏足下以孤軍相持徒傷物命終無所益  
厚德者豈爲是哉朕知足下不守鳳翔則必深入沙漠  
以圖後舉足下初入其地胡或面從然非我族類其心  
必異據其地不足以爲資失其地適足以自損使兵威  
常強尚云可也倘中原相從之衆以胡地荒涼或不樂  
居其心叵測一旦變生肘腋孑然孤弱妻孥不能相保  
矣且足下本汝南之英祖宗墳墓所在深思遠慮獨不



及此乎誠能以信相許去夷就華當以漢竇融之禮相  
報否則非朕所知也思齊得書未省我師克鳳翔李思  
齊走臨洮四月克秦隴下鞏昌李思齊乃以臨洮降是  
時張思道在慶陽聞我下臨洮乃使其弟張良臣守慶  
陽走寧夏王保保在寧夏遂爲保保所執我師下平涼  
張良臣遂以慶陽佯乞降達信之予右丞薛顥騎五千  
步卒六千往良臣蒲伏出迎其夜遂却我師傷薛顥遂  
怒分遣諸將四面圍守王保保爲與聲援攻陷我原州  
遂遣馮宗異西軍驛馬關追擊走之慶陽援絕其部將



姚暉等乃開門納師達入良臣投井死

斬之上初得臨洮之捷即遣往勞大將軍論

張思道兄弟多謫詐若來降宜審處之勿墮其計

而良臣叛達與諸將嘆曰帝真明見萬里外是年元

相也速入寇我通州時常遇春從大將軍在鳳翔詔

東還禦也速復使李文忠副之往取元君開平元君先

已北奔遇春破開平斃于軍上乃詔文忠代將其軍

還從大將軍慶陽及太原已聞慶陽平元人攻大同因

遂擊元兵大同禽元將脫伯列上致書於元主曰朕



本布衣因海內鼎沸不能自寧靜觀群雄割據荼毒生靈於心不忍君又不能控禦致諸將各懷不軌外爲元臣內寔自謀靡有勘定禍亂以安生民者廼親率諸將西平湖湘漢沔南取交廣東定吳越八閩兩江皆入版圖方欲息兵以觀君之爲計而君之將臣張思道李思齊王保保三人者不爲國謀分據秦晉互相讐殺民遭塗炭朕乃命大將軍自前歲出山齊魯經河洛次燕趙我師未至君已棄宗社去朕謂君自知胡無百年之運能順天道歸我中國故土上策也未幾邈將來報君率



殘兵留連開平朕思君前日宗社莫安國用富實尚不  
能削平群盜今遠寄沙漠歆效漢之匈奴唐之突厥出  
沒不常以爲邊患是君之計不審也方今中國封疆盡  
爲我有華夏已平外夷咸附若命將出師直抵陰山之  
北則君雖有百萬之衆亦不過死灰之餘燼涸轍之朽  
𩚑耳何能爲哉此時君卽遁逃亦將無所往矣朕以誠  
心待人明示機策改圖易慮安分順天以存宗祀不亦  
善乎君其圖之九月王保保寇蘭州鞏昌守將于光赴  
援爲所執死之詔以臨濠爲中都上曰臨濠前江



淮以險可特以水可漕使建城池宮闕如京師 詔  
天下郡縣立學校十二月 詔赦臨洮將士亡匿山谷  
者皆勿問

二年 上語諸將曰元王棲遲塞外王保保近以孤軍  
犯我蘭州志欲僥倖尺寸之利朕不滅之不已今欲卿  
等出師當何先諸將皆曰保保所以不忘寇邊者以元  
王猶在也先取元王保保降矣 上曰保保方臨邊舍  
之而取元王忘其近而趨于遠失緩急之宜非計之善  
者朕意欲分兵二道一令大將軍自潼關出西安持定



西取王保保 令左副將軍出居庸入沙漠追元主使  
其彼此自救不暇應援如孤豚之遇猛虎取之必矣於  
是諸將皆頓首受命二月追封部子興爲滁陽王四月  
冊封諸王以第二子櫟爲秦王第三子桐爲晉王第四  
子 爲燕王第五子櫟爲周王第六子栢爲楚王第七  
子搏爲齊王第八子梓爲潭王第九子杞爲魯王第十  
子檀爲蜀王姪孫守謙爲靖江王皆授冊寶置相傳官  
屬五月 詔開科取士大將軍大敗王保保沈兒谿王  
保保走從元主于和林都督孫興祖戰死右丞胡德濟



失律達械還京 上予勅曰將軍欲效衛青不斬蘇建  
獨不見穰苴之待莊賈乎且慢軍功者悉歸之朝廷則  
將軍之威玩而號令不行矣胡右丞之失律正當就軍  
中戮之足以警衆所謂閫外之事將軍制之若送至朝  
廷朝廷必議其功過又非閫外之比矣彼嘗有救信州  
之功守諸暨之勞故不忍加誅懼將軍緣此緩其軍法  
是用遣使即軍中諭意自今務威克厥愛毋事姑息追  
封孫興祖燕山侯左副將軍李文忠擢元主于應昌四  
月元主先已殂太子愛猷識理達立文忠破應昌太子



跳獲元孫買的里八剌及后妃諸王并玉璽寶冊鎮圭  
群臣請獻俘 太廟 上曰古者雖有獻俘之禮武王  
克殷用之乎楊憲對曰武王時不可知唐太宗行之矣  
上曰太宗以待王世克遇隋子孫恐未然元雖夷狄八  
主中國百年之內生齒浩繁家給人足朕祖父預享其  
太平雖古有獻俘之禮朕所不忍其令服本俗衣以朝  
賜中國衣冠謝恩其母及妃亦令朝見中宮如元孫儀  
既見賜第龍山封崇禮侯謚元主曰順帝頒平沙漠詔  
于天下群臣皆賀先嘗仕元者不許賀十一月大將軍



徐達左副將軍李文忠班師 上以武成告郊廟大封功臣 上曰卿等從朕起兵以來披堅執銳征討四方戰勝攻取之功朕何能一日忘今天下既定是用報卿爵賞朕皆自定至公無私如御史大夫湯和與朕同里閭結髮相從屢建功勞然嗜酒妄殺不由法度趙庸從李文忠取應昌功不細而乃私其奴婢隳國法廖永忠戰鄱陽時奮勇忘軀與敵舟相拒朕親見之可謂奇男子然使所善儒士窺朕意邀封爵僉都督卽子興不奉主將之命不守紀律雖有功未足以掩過此四人皆止



封侯平章李文忠總兵應昌逐元太子遠遁沙漠獲皇  
孫妃嬪重寶悉歸朝廷功最大御史大夫鄧愈自幼相  
從屢更任使雖經摧挫口無怨言此二人宜列公爵左  
丞相李善長雖無汗馬之勞然事朕最久供給軍食未  
嘗缺乏右丞相徐達與朕同鄉里朕起兵時即從征討  
四方摧強撫順勞勩居多此二人已列公爵宜進大國  
以示褒嘉餘悉據功定封書云德懋懋官功懋懋爵  
不稱德賞不酬勞卿等其自今廷論之毋得退有後言  
諸將咸頓首悅服於是進封宣國公李善長爲韓國公



食祿四千石進封信國公徐達爲魏國公食祿五千石  
封常遇春子茂鄭國公李文忠曹國公馮勝宋國公鄧  
愈衛國公並食祿三千石湯和封中山侯耿炳文長興  
侯吳良江陰侯廖永忠德慶侯傅友德潁川侯趙庸南  
雄侯楊璟營陽侯郭興輦昌侯顧時濟寧侯吳禎靖海  
侯唐勝宗延安侯陸仲亨吉安侯費聚平涼侯周德興  
江夏侯陳德臨江侯華雲龍淮安侯胡美豫章侯朱亮  
祖永嘉侯韓政東平侯俞通源南安侯康茂才子鐸斬  
春侯並食祿一千五百石王志六安侯鄭遇春萊陽侯



賢良臣宣寧侯黃彬宜春侯梅思祖汝南侯陸聚河南  
侯並食祿九百石華高廣德侯食祿六百石皆予鐵券  
令世世勿絕也封汪廣洋爲忠勤伯劉基爲誠意伯食  
祿二百四十石無世券封薛顯爲永成侯不予券顯嘗  
妄殺馬軍又殺天長衛千戶吳富 上不忍掩其功封  
之謫居海南祿亦予千五百石參分之二以贍馬軍及  
富家一以養顯老母妻子汪興祖封東勝侯時有言其  
過者 上宥弗問然弗予誥券追封故功臣馮國用爲  
郢國公俞通海爲虢國公丁德興爲濟國公加封耿再



成爲泗國公人宴功臣 上曰朕與卿等共創大業勞  
心苦力艱難多矣艱難得之必當艱難守之卿等今皆  
安享爵位優游富貴不可忘艱難之時人之常情每謹  
於憂患而忽於宴安然不知憂患之來常始於宴安也  
今日與卿等宴飲極歡恐久而忘其艱難故相戒勉明  
日達等入謝 上退御華蓋殿賜坐從容語曰今成一  
統之業皆汝諸將之功也達等頓首曰臣等起自畎畝  
際風雲之會每奉成筭出師按其次第如指諸掌及其  
成功不夫毫髮此天錫 陛下聖知非臣等所能與



上曰曩者四方紛亂群雄並起朕與卿等初起鄉土本  
圖自全非有意於天下及渡江以來朕觀群雄所爲皆  
無救民之心徒爲生民之患若士誠友諒尤爲巨蠹士  
誠恃其財富侈而無節友諒恃其兵強暴而無恩朕獨  
無所恃所恃者卿等一心共濟艱危故來者如歸初與  
二寇相持人有勸朕先擊士誠以爲士誠門庭之寇友  
諒稍遠若先擊友諒則士誠必乘吾後此亦一策然不  
知友諒剽而輕士誠狡而懦友諒之志驕士誠之器小  
志驕則好生事器小則無遠圖故友諒鄱陽之役與戰



宜速吾知士誠必不能越姑蘇一步以爲之援也向若  
先攻士誠則姑蘇之城并力堅守友諒必空國而來我  
將徹姑蘇之師以禦之則疲於應敵事有難爲朕之所  
以取二寇者固自有先後也二寇既除兵力有餘鼓行  
中原宜無不下或勸朕盪平群寇乃取元都若等又欲  
直走元都兼舉隴蜀皆未合朕意朕所以命卿等先取  
山東次及河洛者先聲既震幽薊自傾且朕親駐大梁  
止潼關之兵者知張思道李思齊王保保皆百戰之餘  
未肯遽降急之非北走元都則西走隴蜀并力一隅未



定也故出其不意反施而北元衆膽落不戰而奔然  
後西征張李二人望絕勢窮不勞而克惟王保保猶力  
戰以拒朕師向使若等未平元都而先與之角力彼大  
望未絕困獸猶鬪聲勢相聞勝負未可知也事執與友  
諒士誠又相反至於閩廣傳檄而定區區巴蜀恃其險  
遠此特餘事耳若等可以少解甲冑之勞矣達等皆頓  
首謝

四年伐蜀初明玉珍雖怙險阻然常修好於我玉珍死  
遂寇我興原 上曰豺狼心終懷嚙噬不可不討於是



以中山侯和爲征西將軍與德慶侯永忠率舟師由  
塘趨重慶以潁川侯友德爲征虜前將軍與濟寧侯  
率步騎由秦隴趨成都三月故元遼陽行省平章劉益  
以遼東來降詔置遼東衛以益爲指揮同知四月和克  
歸州水漲駐師未進友德已拔階文綿三州上因予和  
書責和逗遛而和右副將軍廖永忠引兵獨進襲破瞿  
塘關入夔府約和會師重慶夏主明昇遂與其母彭氏  
偕中泮友德亦遂拔漢州下成都蜀平 上封昇歸善  
侯 上以永忠功最賜白金文綺汪興祖歿于海



復其爵予世券營陽侯璟南雄侯庸先潛師永嘉侯亮  
祖擅杖殺軍校皆不賞明日復論中山侯曰卿朕舊人  
自濠梁相從功不細然不掩過故封卿爲上侯今虛上  
公之爵俟卿卿不自奮而使他将得上功朕甚爲卿惜  
之不得私卿也和叩頭謝曰陛下屬臣重任臣愚劣  
失機緩事死有餘責陛下天地之量宥不誅臣已過  
望况敢希重賞乎遼東降用洪保保叛殺指揮劉益走  
金山爲納哈出數犯塞上於是乃置遼東都指揮使  
司以馬雲葉旺爲都指揮使益兵以備之使使齎書諭



納哈出曰朕聞將軍威震遼左英貨如是是足保定一方然既往不復君子當察昔在趙宋君主天下立綱陳紀黎庶莫安迨至末年權綱解紐故元太祖興于朔方世祖入統中國此天道非人力也元之疆宇非不廣人民非不多甲兵非不衆城郭非不堅及紅巾起于汝潁群盜徧于中原僭名號者繼出小明王稱帝于亳徐真一稱帝于蘄陳友諒稱帝于九江張士誠稱王于姑蘇明王珍稱帝于西蜀彼四帝一王皆擁兵數萬割據中夏踰二十年朕本淮民爲群雄所逼因集二三將帥以



嬰時難遂渡江與將軍會于太平朕待將軍不敢與他  
俘比特加禮遇且知將軍爲名家子故縱將軍北歸今  
二十七年矣朕見群雄無成用率六師北平中原南定  
關越東取方氏西收巴蜀四帝一王皆爲俘虜惟元君  
奔凡日亡華夷悉定天下又安此天命非人力也近聞  
將軍居金山大張威令吾兵亦守遼左與將軍旌旗相  
望將軍若能遣使通問貢獻卽就彼中順其水草猶可  
自雄一方不然胡無百年之運大厦旣傾非一木可支  
繫之後先惟將軍自思之納哈出番使不遣



五千正月遣翰林待制王禕齋詔往諭雲南召還永成  
侯倅顯復其祿鑄世券予之 上御武樓籌邊中書左  
丞相魏國公徐達曰今天下大定民庶已安北虜歸附  
者相繼惟王保保出沒邊境人復遣居和林臣願鼓率  
將士勦絕之 上曰此一窮寇耳終當絕滅姑置之達  
曰王保保在終必爲寇不如取之永清沙漠 上曰卿  
必欲征之須兵幾何達曰得兵十萬足矣 上曰兵須  
十五萬其分三道以出於是達爲征虜大將軍帥兵  
五萬出鴈門至嶺北以曹國公李文忠爲征虜前將軍



帥兵五萬出居庸至青海以宋國公馮勝爲征西將軍  
帥兵五萬出金蘭至甘肅王保保遠竄宣寧侯曹良臣  
深入死之追封安國公命衛國公鄧愈江夏侯周德興  
江陰侯吳良分討古州田州澧州等處洞蠻平之八月  
貴州宣慰使蔣翠上言部落隴居結攸佬阻兵乞討除  
上曰隴居反側其必請翠激之中國之兵豈外夷報怨  
之具耶不許是年徙歸德侯陳理歸義侯明昇于高麗  
二人頗有怨言聞上上曰童孺輩語言小過不足問  
但恐小人蠱惑不能保其終宜處之遠方則讎隙無自



而至仍賜高麗王文綺俾善待之

六年正月上諭徐達曰處太平之世不可忘戰畧荒裔之地不如守邊乃命徐達李文忠分往山西北平練兵六月胡人寇武朔諸州達遣臨江侯陳德鞏昌侯郭子興擊却之八月胡寇河州千戶王才戰死臨江侯復擊敗之斬首六百級禽僞僉樞忻都上以大將軍等久出師賜勅諭曰卿等與朕平定天下勲業已成而瑣瑣殘胡不能盡討致連年出師勞民擾衆孰任其咎昔田單攻狄久之不下問計於魯仲連仲連曰將軍在即墨



時飲食起居與士卒同甘苦身先士卒所以致勝今將  
軍東有夜邑之奉西有淄上之娛黃金橫帶馳騁乎淄  
澠之間有生之樂無死之心所以不勝也卿等皆起布  
衣一旦至此遂忘昔日之艱難豈不犯仲連之誚乎卿  
等宜益懋其功以副朕懷十二月故元梁王殺我使臣  
王禕

七年二月召大將軍及左副將軍還京勅令分布列侯  
留駐山西北平防邊復命左副將軍總兵北討七月文  
忠進克大石崖斬故元宗王朶朶失里破豐州斬魯王



獲其王妃金印九月遣故元宦者咸禮表上花帖木兒  
送崇禮侯北還上諭崇禮侯曰爾本元君子孫國亡  
就俘曩欲即遣爾歸以爾年幼道里遼遠恐不能達今  
既長成朕不忍令爾久客於此故特遣歸見爾父母親  
戚以全骨肉之愛諭二宦者曰此爾君之嗣不幸至此  
長途跋涉爾善視之因致書愛猷識理達臘曰大明星  
帝記諭大元幼君曰順天者昌逆天者亡古今通論如  
是非新造之語自古無千載國家亦理之常也且君之  
父子當主中國之時兵多將廣尚不能自持其權以致



二等兵多者意在莽操懿溫中等者頡頏日廢生民下  
等者東送款西歸降剝民以供上下君之父子皆一勅  
令而誰何者歟以今日之事君尚迷如酒酣昏若重寢  
所以不省者何蓋在至正之間兵多將廣尚不能駕馭  
又被逼挾今之衆壯弱不過二萬流離邊境意圖中興  
君之神謀予不知何如耳君能自度今時之權比至正  
時低昂若何以此觀之豈不愚哉君以萬騎或八千騎  
欲與全中原相抗予又不知輕重若何予謂君明天理  
若能悟我所言必得一族於沙漠中權時自爲或得善



終何以見之君之祖宗有天下者一百餘年養育之久  
生齒之繁以此恩此德觀之未必至於便終此亦天理  
之常也君若不悟不效古人之事他日加兵於彼禍福  
有不可測者矣昔君在應昌棄下皇子南來已經五年  
潛養鄉野今聞輿魯去全寧不遠念君流離沙漠無寧  
儲嗣未有故特遣咸禮等護送前去庶不絕元之祀君  
其審之如不答而不省禍將不遠矣

八年四月 上幸中都改中立府爲鳳陽府五月故元  
臣王保保卒王保保即擴廓帖木兒也沈丘人少育于



舅察罕察罕死元令王保保代將其兵 上有江東時

屢遣使者遺之書幣甚恭至輒留不荅後招之亦不復  
顧元亡從愛猷識理達臘和林 上所蚤暮不得高枕

即赫然因兵威誅之然不得以寸削加焉其後復從元  
主徙金山北 上以是心敬擴廓一日宴謂群將士曰

諸君謂誰爲男子者將士曰常將軍所將卒不過萬人  
而橫行無留陣庶耳 上曰是遇春耶不然遇春吾得

而臣之吾竟無以臣王保保其人男子也竟冊其妹爲  
秦王妃十月命皇太子及秦王楚王靖江王講武中都



太子贊善宋濂從上荆山沂長淮大獵遠郊十二月故  
元太尉叻哈出入寇金州遼東都指揮葉旺邀其歸路  
擊走之禽其裨將乃刺吾群臣請以爲戮上弗許命  
爲鎮撫且賜之妻妾田宅焉

九年三月上命中山侯和穎川侯友德往延安防邊至  
則伯顏帖木兒來乞降上聞之召和還勅諭友德曰  
無事而請降兵家所戒爾其慎之已而伯顏乘間入寇  
友德大破之因執之以歸九月皇太子子允炆生十二  
月勅送元臣蔡子英出塞子英河南永寧人以進士需



選還里擴廓辟爲河南開府參軍薦遷行省參政不離  
丞相幕定西之敗與相失子英單騎跳關中轉入南山  
上使使微捕得之渡江亡去變姓名關中爲人管器久  
之復見跡械過中山侯中山侯抑使膝坐不肯火其鬚  
且盡有妻流來洛陽道欲見子英子英避不肯見已至  
京師上令置外舍沐欲官之子英退而因舍人上書  
不受命上義之陰戒舍人謹事子英亡恙以旦夕聞  
起居一夜子英大哭不止舍人問之曰吾自念故主耳  
令人具狀聞上嘆曰吾何苦一蔡子英彼喋喋泉下



些我哉縱出塞子英追從元主於和林

十年四月命衛國公鄧愈爲征西將軍大都督府同知  
沐英副之出討吐蕃追斬至崑崙山而以涼州等衛將  
士分戍驪北諸處師還封英西平侯祿二千五百石予  
世券八月以胡惟庸爲左丞相汪廣洋爲右丞相十一  
月四川威茂土酋作亂命御史大夫丁玉往討平之  
十一年正月進封中山侯湯和爲信國公食祿三千石  
予世券四川松潘蠻亂命御史大夫丁玉爲平羌將軍  
討平之王請置衛守備上曰松州在萬山之中山多



山少耕種不足於用若以四川民人供給守禦廢有用之民守無用之地非良策也其更計議以聞王言松州西羌諸蠻要地不可罷從之詔置松州衛是年封皇子柏爲襄王桂爲豫王後改封楨爲漢王後改封植爲衛王後改封遼王

十二年正月西番洮州十八族番酋三副使等據納鄰七站之地叛命西平侯沐英都督僉事藍玉等討平之英請置衛守備曹國公李文忠是時督理河岷等處軍務上言饋運不便上曰洮州西控番戎東蔽湟隴漢



唐以來備邊要地也慮小費而生大患非計其以所獲牛羊給衛士可支軍食二年詔置洮州衛四月遼東守將潘敬葉旺以高麗致書貢物來奏上予勅諭曰古之能將出禦封疆入衛謹密雖內有姦臣外有詐敵間無入焉高麗古稱東夷聖人有云夷狄禽獸也輕交必離重交必絕未有能始終者也斯來乃間諜之萌其知備乎謂與外交者可三國羊祜是其人也餘非其人每以是階禍爾其慎之旣而龍州民鄭白等率五戶來降上復予勅曰爾二將軍識否乎高麗僻居海隅俗詐民



底人情安土重遷豈肯舍桑梓而歸異鄉者斯必示弱  
於我也一二年間如此踵至深有智焉宜亟遣回以破  
其姦邇者中國方寧正在休兵息民之時無生小隙使  
彼得爲口舌六月征西師還封藍玉爲永昌侯王弼爲  
定遠侯張龍爲鳳翔侯吳復爲安陸侯葉昇靖寧侯謝  
成永平侯張溫會寧侯曹興懷遠侯周武雄武侯金朝  
興宣德侯並祿二千石世指揮使都督仇成時已邁年  
上念成爲渡江勛舊每戰有先登之勞特封安慶侯食  
祿二千石世襲原職指揮使七月四川妖人彭普貴搆



亂勅御史大夫丁王徃平之十月召永嘉侯朱亮祖還京番禺知縣道同上言亮祖廣東多不法上以其功臣不下吏罷不用數詰責之不服怒而鞭之遂死仍侯禮葬焉

十三年正月左丞相胡惟庸謀逆伏誅連韓國公李善長吉安侯陸仲亨上曰朕初起兵時李善長來謁軍門曰有天有日矣是時朕年二十七善長年四十一言多合朕意遂命贊畫功成爵以上公以女與其子陸仲亨年十七父母兄弟俱亡恐爲亂兵所掠持升麥藏草



聞朕見之呼曰來遂從朕長育以功封侯此皆吾初起  
時腹心股肱吾不忍罪之其勿問三月燕王之國北平  
故元國公脫火赤知院愛足屯和林患邊 上命西平  
侯沐英總陝西兵往討之英聞脫火赤兵次亦集乃路  
遂涉七晝夜分軍四道啣枚夜進合圍之禽脫火赤愛  
足盡獲其部落男女馬駝牛羊以歸

十四年正月命魏國公徐達爲征虜大將軍信國公湯  
和穎川侯傅友德爲左右副將軍率長興侯耿炳文西  
平侯沐英等將兵出塞追討乃兒不花遁走之遂襲灰



山克嵩州高州全寧諸部貪平章別里哥樞密副使文  
通知院李宜還五月湖南五谿蠻作亂 上議出師江

夏侯周德興於是老矣請行 上未之許也固請 上

壯而遣之手書勞曰古之將臣忠於爲國者盡知勇筋  
力之所能及禦灾捍患終其身而後止若趙克國圖取  
西羗馬援請討交趾朕嘗嘆羨謂古有其人而今不可  
得今卿年逾六十奮然請行忠勤不怠卿之志見矣禦  
侮安民正在斯行功成師旋朕當有以報卿也七月德  
興師至五谿諸蠻散走不敢復出會四川西南諸夷洞



皆作亂 上因遂授德興征南將軍令移師討平之帥  
還賜田一庄曰朕以此報卿爲卿子孫世祿九月命穎  
川侯傅友德爲征南將軍永昌侯藍玉西平侯沐英副  
之帥師三十萬討雲南雲南故爲段氏僭竊之邦國號  
大理元世祖滅之封其子忽哥赤爲梁王都善闡世官  
段氏後爲大理宣慰使 上即位之歲段寶與梁王隙  
嘗遣使自會川來輸款 上降詔答慰之寶卒而好遂  
不通十二月我師至曲靖大破梁王將達里麻兵于白  
石江禽之梁王出走滇池死師次金馬山右丞觀音保



奉王金印及各官符信圖籍出迎降 上特馳詔往諭  
烏蒙烏撒東川等處諸蠻尚其洗心滌慮效順中國朕  
當一視同仁無間我師尋搗烏撒破諸蠻 上仍各賜  
諸酋冠帶有差是年冬封皇子權爲寧王

十五年正月詔置雲南都指揮使司及承宣布政使司  
閏二月我師進克大理長驅至金齒而車里平緬百夷  
君長由是皆降服焉八月丙戌皇后馬氏崩九月奉塋  
于鍾山孝陵謚曰孝慈皇后是月乙丑熒惑犯南斗勅  
戒征南將軍傅友德嚴飭將士以備不虞十二月命長



興侯耿炳文延安侯唐勝宗巡視陝西軍馬

十六年正月詔以雲南所屬烏撒烏蒙芒部三府隸四川三月詔征南將軍傅友德班師命右副將軍沐英留鎮九月命申國公鄧鎮臨江侯陳鏞濟寧侯顧敬率兵討龍泉永新諸縣山寇平之

十七年正月命魏國公徐達出鎮北平命信國公湯和巡視海道築山東江南北浙東西海上諸城四月諭平雲南功進封傅友德爲穎國公食祿三千石藍玉仇成王弼先已封侯予世券及子孫祿並二千五百石封都



督僉事郭英爲武定侯胡海爲東川侯陳桓爲普定侯  
張巽爲鶴慶侯並祿二千五百石予世券

十八年三月命宋國公馬勝爲征虜大將軍偕潁國公  
傅友德永昌侯藍玉率京衛將士往北平練兵備邊四  
月思州苗叛命信國公湯和江夏侯周德興帥師從楚  
王討平之七月五開山諸洞蠻作亂復勅和等移師剿  
捕和械其酋吳面兒歸戮于京師仍詔和駐師撫定其  
民乃還

十九年二月納哈出營金山犯塞命宋國公馬勝總兵



出屯絳橋操練兩月而還

二十年正月命宋國公勝爲征虜大將軍潁國公友德  
永昌侯玉爲左右副將軍帥師三十萬往征納哈出因  
遣其故將乃刺吾北還諭之二月我師夜襲虜騎于慶  
州破之進逼金山降其部將觀童乃刺吾還見納哈出  
于松花河諭上意遂降之旣而納哈出與右副將軍  
玉語相失悔欲去常將軍茂前斧其臂虜大驚潰勝遂  
繫茂還京茂因訐勝在軍自掠胡馬又強娶有喪胡女  
上怒收勝總兵官印召還而令永昌侯玉行總兵官事



師旋都督濮英將騎三千殿爲餘虜所乘皆陷沒英死  
之九月納哈出至京師封海西侯常茂安置于廣西龍  
州英贈金山侯詔玉爲征虜大將軍延安侯勝宗爲左  
副將軍武定侯英爲右副將軍帥師追剿殘胡十月以  
遼東海運功封朱壽爲舳艫侯封張赫爲航海侯食祿  
二千石予世券

二十一年二月故元司徒阿迷降上知虜勢且蹙勅  
大將軍王來機直搗虜庭王至捕魚兒海大破虜斬一  
太尉脫古帖木兒急與太子天保奴從十餘騎跳身



遁獲其小子地保奴及故太子必里禿妃與公主等以  
歸上聞捷大喜擬封王爲梁國公已聞王私元主妃大  
怒曰王無禮乃爾何所稱大將軍爲改封涼鐫其過于  
赤五月東川蠻叛 上復命潁國公友德爲征南將軍  
帥師往會西平侯英討平之東川諸夷裔皆出囉囉而  
越州阿資亦囉囉種也與偕叛寇普安阿資曰國家有  
萬軍之勇我有萬山之險安能害我據層崖爲寨我以  
精兵蹙之皆墜死還走越州我師追取其叛黨殲之阿  
資乃降英請置越州馬隆二守衛 上令友德率二十



四將軍分駐湖川控制之諭之曰西南諸夷自昔號稱  
難服其山林木叢積夏多霧雨地烝濕蛇虺蚊蚋之毒  
隨處而有人入其境不服其土故生疾收所以多難成  
功今雖稍定然恐大軍一還輒復跳梁嘯聚豈不重勞  
吾將士乎今宜還軍分駐要地休息士卒且以控制諸  
夷斯爲善後長策使至其如所諭毋忽十月勅五軍都  
督府曰養兵而不病於農者其屯田乎今海宇寧謐邊  
境無虞使兵坐食於農農人必受其弊非長治久安之  
術也其令天下衛所督軍屯種



二十二年故元宗室遼王阿禮失里及朶顏諸酋請內  
附詔以其地立三衛居之曰泰寧曰福餘曰朶顏以阿  
禮失里爲指揮使搭賓帖木兒爲指揮同知居泰寧以  
海撒男答奚爲指揮同知居福餘以脫魯忽察兒爲指  
揮同知居朶顏各領所部爲外藩畜牧遷徙從其俗五  
月征南將軍傅友德有疾詔還京尋召從軍諸將皆還  
二十三年正月命穎國公友德等以燕兵從燕王定遠  
侯弼等以晉兵從晉王分道伐虜燕王師出古北口聞  
元太尉乃兒不花等在迤都時大雨雪王乘雪夜直抵



迤却與虜一磧隔而虜不知也王先遣觀童詣虜觀童  
故與乃兒不花善見則相抱泣頃之王師已壓虜營虜  
大驚乃兒不花欲上馬走觀童曰燕王也毋恐乃兒不  
花聞王威名舊矣遂不去觀童引見王王降辭色慰諭  
賜酒食令醉飽虜甚喜比遣去度將至營輒復召來如  
此者二乃兒不花遂率其部落并孳畜等從王歸捷奏  
上喜曰清沙漠者燕王也以乃兒不花爲留守衛指揮  
同知晉王出塞不見虜還五月肅清安效黨太師韓國公  
李善長自殺 上以天下無事詔遣公侯還鄉各賜賚



有差初 上念公侯皆國勲舊人賜卒百十有二人從  
所謂奴軍也至是各設百戶一人領之給屯田使自耕  
食賜鐵冊曰曩者朕與群雄並驅於諸將中拔其出群  
者爲帥首以統軍自渡江來平定天下今三十餘年念  
諸將老矣令其錦衣還鄉特命爾爲百夫長各率兵百  
十有二人以護衛其家俟其壽老子孫承襲則兵皆入  
衛罷其屯戍爾尚欽哉十月命劉基孫薦襲封誠意伯  
增祿二百六十石予世券

二十四年三月封皇子梅爲慶王松爲韓王模爲潘王



經爲唐王八月命皇太子巡撫陝西命都督劉真宋晟  
征哈梅里哈梅里在和林西元屬兀納失里大王居之  
往來患苦西域諸貢使上嘗遣使招諭之不從於是  
師臨其城大破之兀納失里遁去俘獲甚衆十一月皇  
太子至自陝十二月命都督俞通淵統貴州辰沅各衛  
軍征古州諸蠻洞平之

二十五年三月命宋國公馮勝穎國公傅友德等往陝  
西山西河南簡閱七馬四月丙子皇太子薨謚曰懿文  
祔塋孝陵五月俞通淵師旋上以其有功克續父兄



遣烈封越雋侯食祿二千五百石予世券西戍罕東侵  
塞命涼國公藍玉率蘭州諸衛將士徃征之玉師至阿  
真川土酋哈智等遁去 上遂詔玉爲總兵官轉討建  
昌叛酋月魯帖木兒是時四川都指揮使瞿能數與月  
魯帖木兒戰數敗之斬其把事七人月魯帖木兒佯請  
降遁入栢興州復率麼些洞土豪賈哈喇以叛 上使  
諭玉必禽之而後已其用事者楊把事及達達千戶二  
人捕執之勿失昔寇恂斬皇甫文而降高峻用此計也  
玉乃計遣百戶毛海誘致之歸戮于京師玉請增置屯



衛從之玉又請籍民丁爲兵并討長河西及朵甘百夷  
上曰民勞甚復籍之其何以堪此非四十萬衆不可行  
其徐議之且班師九月立皇孫允炆爲皇太孫以修撰  
黃子澄兼少詹事侍東宮講讀

二十六年二月涼國公藍玉謀反伏誅命宋國公馮勝  
往北平備邊聽燕王節制十一月封皇子梗爲岷王穗  
爲谷王是年倭寇浙東

二十七年二月命魏國公徐輝祖安陸侯吳傑往浙東  
操練沿海衛士防倭十二月女直部野人寇遼東



二十八年正月勅燕王發北平遼東屬衛騎兵以右軍都督僉事劉真爲總兵官剿捕野人廣西奉議南丹何武等州蠻叛八月命左軍都督楊文爲征南將軍廣西都指揮使韓觀爲左副將軍右軍都督僉事劉真爲右副將軍帥師十五萬徃征之俘斬萬有八千人撫輯降蠻六百四十八戶請置衛縣留戍從之

二十九年寧王權上言騎兵巡塞虜有脫輻遺於道恐寇邊上曰虜多奸故以示弱於人誘我也懼有伏焉勅燕王選精騎出大寧覘之遇虜與戰于徹徹兒山禽



胡首將索林帖木兒還九月大賚天下致仕武臣水西蠻叛十一月以右軍都督僉事顧成克總兵官掛征南將軍印率貴州都指揮使司軍馬剿平之

三十年正月命長興侯耿炳文爲征西將軍武定侯郭英副之出巡西北備胡漢中盜起討平之五月庚申夜有星大如雞子自天厨入紫微垣二小星隨之至游氣中沒上以天象示變其占爲邊戍不寧勅晉撫代遼寧谷六王飭兵備虜古州蠻叛平羌將軍都指揮齊讓討之無功八月命左軍都督楊文爲征虜前將軍代之



詔征南將軍顧成率軍會剿遂平諸洞而還平緬蠻刀  
幹孟叛逐宣慰使思倫發思倫發赴愬于上上憫之  
十一月命西平侯沐春爲征虜前將軍都督僉事何福  
爲左將軍徐凱爲右將軍率雲南四川諸衛軍擣南甸  
大陂之斬其酋刀名孟尋又破其二寨刀幹孟乃乞降  
春以聞上虞其詐也令伺變禽之亡何春卒刀幹孟  
復反十二月癸未上不豫群臣數問安勅之曰昔有  
元治世民庶乂安何期至正之君失於勤民慢於事神  
由是假手群雄倡亂華夏兵興之時朕潛草野不得已



而從戎當時倡亂稱尊者幾人恣爲吞併自相磨滅如  
此者十有七年朕西定荆楚東平吳越北撫華夏爲衆  
所推戴定鼎金陵國號大明改元洪武三十年于茲朕  
壽亦七十矣靜而思之非皇天眷命安得居天位若是  
久哉古語云天不與苜亂豈非朕無心於天下以救民  
爲心故天特命之乎近者失調受疾卿等頻來問安禮  
也堯舜禹湯文武之世皐陶稷契伊尹周召爲之臣其  
有志匡主一也朕以此示卿等宜竭忠修職勿致至懷  
三十二年四月

立



指桐梓謂太常寺臣曰往年種此今不覺成林鳳陽陵  
樹當亦似此因感愴泣下已而曰昔太廟始成遷主就  
室朕退而休息夢朕皇考呼曰西南有警覺即視朝果  
得邊報祖考神明昭格在上無時不存爾等當祭祀宜  
加敬慎旦暮中使供灑掃奉神主恐有不虔當以時省  
視務令齊潔以安神靈五月都督何福禽叛蠻刀幹孟  
思倫發復還平緬甲寅上不豫戊午勅左軍都督楊  
文曰兵法有言二心不可以事上疑志不可以應敵爲  
將者不可不知是也朕子燕王在北平北平中國之門



戶今命爾爲總兵官往北平叅贊燕王以北平都司行  
都司并燕谷寧三府護衛馬步軍隨燕王往開平隄備  
一切號令悉聽燕王節制勅武定侯郭英曰朕有天下  
胡虜遠遁久矣然萌孽未殄不可不防朕今命爾爲總  
兵官往啓遼王以遼東都司并護衛各衛所軍隨遼王  
至開平隄備一切號令悉聽燕王節制乙亥勅燕王曰  
朕觀成周之時天下治矣周公猶告成王曰詰爾戎兵  
安不忘危之道也今雖海內無事然天象示戒夷狄之  
患豈可不防朕諸子汝獨子秦晉已薨汝寔爲長孳外



安內非汝而誰朕已命楊文總北平軍郭英總遼東軍  
并各護衛悉聽汝節制汝其總率諸王相機度執用防  
邊惠乂安黎庶以答上天之心以副吾托付之意其敬  
慎勿怠閏五月乙酉 上崩于西宮越七日辛卯葬孝  
陵是日皇太孫即皇帝位號謚大行皇帝 太祖高皇  
帝 孝慈皇后孝慈高皇后初帝在甥館每見諸帥殘  
虐輒用收心其後命將誓師靡不倦倦首以嗜殺爲戒  
以故義旗攸指兵無血刃吏民安堵然猶大創於漢再  
創於吳元社既屋中原已復而孽胡未殄蠻夷內訌終



帝之世師徒歲出蓋一統若斯之難也非帝睿謨神略  
勤思淵遠孰使四方底定萬年鞏固迄于今日云

臣衡曰臣聞太祖攻陳埜先時方假寐有蛇緣其臂

左右驚以告視之類龍也而無角太祖曰異哉蛇其

神乎神則棲我纓中蛇徐徐入纓中太祖遂舉纓戴

之親帥諸將出禽埜先而還脫視之蛇居纓中無恙

太祖引觴飲蛇蛇亦蜿蜒出飲久之乃升屋去是何神

異迺爾乎其後往攻婺州城中人見有五色雲簇擁城

西甚異之蓋太祖駐師處云帝王之興豈固有徵與



於平流公之鳥躍舟之魚自古記之矣